

Roma

Paulo âirjaet keiŋe.

¹ Galalupne, nâmâ Paulo Yesu Kristogât hon bawa manman. Nâ âmâ Kristoŋe menekmâ aposolo nogonmâ Anutugât pat âlep den maktere ârândân akmâ ariâkgât mem kepilânegep.

² Akto Anutugât den pat âlep are âmâ Anutune tâmbâŋe dondâ propetelupŋe makyengimbo kulemgoyi.

³ Kulemgoyi aregât keiŋe amâ Anutugât nanŋe miawagep. Yâk âmâ hâk olop miawakmâ Dawidigât hakulupŋe yâk yengâlânba miawagep.

⁴ Gârâmâ Heak han kau kau akmap arekŋe kârikŋe akmâ yâk amâ Anutugât nanŋe hain miawakmâ maknengiep. Aregât keiŋe momoŋânba agalewân miawakmâ tek tekŋân miawakto âmâ Yesu Kristo amâ Humonenŋe dâm nâŋgâyion.

⁵ Yâkŋe âmâ han kalem aknengim aposologât âi nengiep. Nengim âmâ yâkgât kotŋe patŋe ariâkgât akto hânŋe hânŋe arim hârok makyengienŋe bikŋande nâŋgâm Yesu nâŋganmâ aregât launŋe lokowaigât âi nengiep.

⁶ Akto Anutune Yesu Kristogât kâmot miawagâk dâm olonŋegep yâk yengâlânba ye gai hainâk olonŋegep.

⁷ Roma kepihan gâtŋe Anutune han kalem akyengim nâŋgât kâmot dâm yengonlep. Yengât âmâ hin ulilanŋân. Ewenenŋe Anutu akto Humonenŋe Yesu Kristo han kalem akmâ damun yengim

akbela han kalem akto lumbe yengâlân hâtikom yendo biwiyenê sândugewiâp. Hain.

Paulonê Roma luâk âmbâle yekberâm magep.

⁸ Galalupne yenê Yesu nânğanmâ kepilâm manmai, aregât pat sambelembo nânğâmbiâ ârândân aktâpgât Yesu Kristogât akmâ nâ Anutu mepainê mem mandân.

⁹ Nâ Anutugât nanjaet pat âlep den makmâ hannande Anutu manandere keine nânğâp gât yâkgât metenân den ire makyengire nânğânet.

¹⁰ Nâ hokboâk hokboâk yengât akmâ Anutu ulilanman. Akto Anutunê nânğâmbo ârândân akto dâp peneniņdo yengâlân togowian a gai ulilanman.

¹¹ Nâ togom ye yekbiangât nânğâm mandân. Togom yekmâ han biwiyenê yeuk agep aregât owâiwaigât meme akyengire kâriknê kinmâ mannetgât makyengim tânyenguwian.

¹² Tânyengum âmâ nâ yengâlân manmâ tatere Yesu nânğanmâ manmaengât maganji goanji akmâ tân agu agu akmâ manbaen.

¹³ Galama, nânğât keine pâpkowâigât hin makyengiwe. Nâ luâk kâmotnê kâmotnê biknê biknê arim makyengim mandere biknande nânğâmbiâ âinaet bunne âlim yiepgât miawakniņep. Are hainâgâk yengâlân togom makyengire âigât bunne miawakniņbiap gât nânğân. Gârâmâ togowerâm akmâ malân ain siâ siâ biknande hikonekto bo togoân.

¹⁴ Dâ nânê luâk hârok, Girik luâk akto Anutu bonânğanmai akto nânğâ nânğâ luâk akto kopanê hârok makyengiwan gât âi tatniņdâp aregâlâk nânğân.

15 Aregât Roma luâk ye hainângâk pat âlep makyenjiwerâm hannande owâim manman.

16 Nâ den pat âlepgât akmâ anunje olop bo akman. Akmâ nângâre anunje olop bo akmap. Den pat âlepne amâ Anutugât kârikneje olowâk arekne luâk âmbâle Yesu nânganbiâ ârândân mem menâleyekbiap, Yuda luâk a soj akto Girik luâk hârok.

17 Den pat âlep arekne amâ Anutugât ârândân dâp mem miawakmâ tek tekjân miawakmâ katmap. Amâ hin. Yesu nânganbiâ amâ Anutune yekto ârândân akbiapgât keije. Akto nânganbiâ Anutugât ârândân dâp yem âgâwapi. Aregât Anutune makto kulemgoyi bikne hin tatâp, Anutune yekto ârândân akmap yâkne amâ Anutugâlâk nânganmâ manmâ âgâwai.

Luâk hârokne Anutu hamianji.

18 Anutugât kuk miawakmap aregât keije hin. Luâk âmbâleje amâ Anutu hepunmâ bâleje akmâ den bunje bo agâkgât kei dâpne gulip komai. Aregât Anutugât kukande himbimân ba miawakyenjimap.

19 Akto Anutune ikiye keije bikne tektekjân mem miawakyenjimapgât ekmâ nângâmai.

20 Amâ Anutune hân liulewânbak Anutugât keije luâkne bo ekmai are akto keije kârikne manmâ âgâwapi are akto ikiye keije pagaleje are hârok miapjân tatmap. Are amâ wan me wan Anutune mângim ketuguep arekne hekatnengimap. Aregât luâk âmbâle hârokne nen Anutugât keije bo nângâmaen dâwaigât dâp bo tatâp.

21 Luâk âmbâle hainare âmâ Anutu mandâp nângâmai. Gârâmâ imâ Anutu Humo dâm bo kângoanmai akto mepainje bo meanmai. Anutu hamianmaigât nângâ nângâ yenje gulip akmap akto biwiyenje hândâkne katip yengumap.

22 Akto ainba hin dâmai, “Nen nângâ nângâ nenje humo aktâp.” dâmai amâ nângâm hilipkoma. Nângâm hilipkom sinduk akmâ manmai.

23 Hain akmâ manmâ Anutu manman kârikne yâkgât pagalenje hâkân akmâ âmâ aregât dumân tukup siâ ketugum luâk momai yengât otneyenje me lâut gât otneje me songo gât otneje me mulungât otneje mângim âmâ are nângâmbiâ humo akto pâwut ligiyengimai.

24 Hain akbiâ Anutunje yekmâ hâkân akyengimbo hanyenje egâlian gulip bâlenje akmâ han hâkyenje mem bâlimai.

25 Yâkne Anutu bundâk ambonje hamianmâ âmâ hiangimaigât nângâmbiâ humo akmap. Hain akto Anutunje wan me wan yân liulep are nângâmbiâ bunje akto hon aganmai gârâmâ wan me wan aregât Ambonje amâ hâkân akmâ hamianmai. Amâ Anutunje egâlian olop manmâ âgâambo nângandenje humo akmâ âgâwipgât ârândân akmap. A bundâk.

26 Gârâmâ luâk âmbâle are Anutunje hepunyekto egâlian bâlenje dondâ penianmai. Hain akto âmbâlenje luâkdâ âmbendâ aregât agak meme âlepne are hepunmâ âmbâleâk egâlianmai.

27 Akto luâk hainâk luâkdâ âmbendâ manman hâkân akmâ hanyenje egâliangât kâlâp humo ondo luâgâk yekmâ egâlianmâ agak meme bâlenje agangimai. Aregât han biwiyenje hilip komapgât hâunje Anutunje hâkyenân pando hâk hilâlâm

nângâmai.

²⁸ Hain akmâ manmâ âmâ Anutugât keiŋe nâŋgâmai are hâkân akmâ manmaigât Anutuŋe hanyeŋe gisap kombo siâ me siâ bo agakŋe are âmâ akmâi.

²⁹ Hain akmâ siâ me siâ bâleŋe keiŋe keiŋe membiâ âgâmap. Bâleŋe akmâ egâlian bâleŋe akmâ hanyenân bâleŋeâk nâŋgâm galagât nâŋgâmbiâ gembo kuk hêngân akmâ luâk bikŋe yeŋgumbiâ moyi dâ bikŋe yeŋgât kotyeŋe mem bâlimai. Akto galagât hogo hogo akmâ haminâŋen makmai.

³⁰ Hain akmâ luâk siâgât agak meme âlepŋe ekbiâ gembo hiangi den makbiâ kotŋe gemap. Hain akmâ Anutu gasa agaŋmai. Akto âgâ âgâŋe akmâ yeŋe hâk mem agatmâ bâleŋaet dâp egâlianmai. Hain akmâ ewe memelupyenâet den komai.

³¹ Hain akmâ han nâŋgâ nâŋgâ bâlâk manmâ Anutu bo nâŋgaŋmâ âmâ han kalem bâlâk manmai.

³² Hain akmâ âmâ Anutugât den ârândân kârikŋe yendâp amâ luâk me âmbâle hain akbiâ âmâ momogât dâp miawakyengiwiap gât den are nâŋgâm metembiâ hanâk dâm bâleŋeâk manmâ âgâmai. Akto areâk bo. Bikŋande hainâk akbiâ nâŋgâmbiâ humo akto heronŋe akyeŋgimai.

2

Bâleŋaet hâuŋe hamepŋe.

¹ Aregât gâ yu kulengoân are oyaŋmâ nâ hain bo akman dât mon? Hain bo. Yeŋe hain are akmâ siânba hâkyeŋe tunbiâ âmâ bo ârândân akmap. Akto yeŋe siânba hâkyeŋe tunmâ agak meme bâleŋe hainâk mem âmâ yeŋe hâkyeŋe tunanŋiwai.

² Anutuŋe luâk âmbâle bâleŋe akmai denân katyekmâ hâuŋe umatŋe yeŋgimbo âmâ ârândân akmap nâŋgâmaen.

³ Aregât gâ luâgâk aregât luâk bikŋe yeŋgât dosa makmâ hâkyeŋe tunmâ areâk akmat gârâmâ agak meme bâleŋe hainâk akmat. Aregât nâ Anutuŋe gâunniŋmâ âmâ umatŋân bo katnekbiap dâmat mon? Hain bo.

⁴ Anutuŋe han kalem akmâ unsambe akŋiŋmâ bo hâkân giŋmap aregât hâkân akmâ manmat mon? Anutuŋe gâ hange purik kat dâm han kalem akŋiŋmap are bo nâŋgâm kotgâmat mon?

⁵ Gârâmâ gâ han kârik akmâ hange bo purikat-menâ âmâ Anutugât kuk metŋe ârândân are mi-awakbiawân ain om bâligekbiap.

⁶ Aregât sopŋân Anutuŋe luâk âmbâle agak meme nenŋaet dowân hâuŋe nengiwiap. Hain.

⁷ Luâk âmbâle bikŋande âmâ pagalenŋaet pat akto Anutuŋe nenekto huraguâkgât manman kârikŋe egâliŋmai are Anutuŋe manman kârikŋe yeŋgiwiap.

⁸ Dâ luâk âmbâle bikŋe âmâ den kautŋe bunŋe hâkân akmâ âmâ bâleŋe mem manne dâm yeŋaet nâŋgâmbiâ humo akmap yeŋgâlân âmâ kuk metŋe bâleŋe miawak yeŋgiwiap.

⁹ Bâleŋe meme luâk hârok Yuda luâk soŋ akto Yuda gâtŋe bo manmai gai yeŋgâlân sik sererek metŋe akto hamep humo miawakyeŋgiwiap.

¹⁰ Gârâmâ ârândân akmâ manbai hârok Yuda luâk are akto Yuda luâk bo manmai yâk Anutuŋe pagaleŋe yeŋgimbo biwiyeŋe sândugembo patyeŋe ârândân akmâ âgâwiap.

¹¹ Are amâ Anutuŋe yeŋgiep. Anutuŋe amâ horat

gorat bo akmâ potat yekmap.

¹² Akto luâk âmbâle bikñe Anutugât den kârikñe Moseñe kulemgoep den are bâlâk manmâ âmâ bâleñe memai amâ yâk hârok den kârikñe bâlâk bâlim metewai. Dâ den kârikñe olop manmâ bâleñe memai yâk hârok den kârikñeñe agak memeyenñe mem miawakyeñgim den âiân makmâ katyekmâ kotgâyeñgiwiap.

¹³ Aregât keñe hin. Anutugât den kârikñe yân ondop yeñân nâñgâwai yâk âmâ Anutuñe yekto ârândân bo akmap. Gârâmâ nâñgâm lokomai yâk âmâ ye ârândân dâm makyenñgiwiap.

¹⁴ Akto Yuda luâk âmbâle bo manmai yâk den kârikñe bâlâk manmai gârâmâ hanyenñande den kârikñe lokom âmâ den kârikñe bâlâk arekñe den kârikñe olop tirip hainare akmai.

¹⁵ Hain akbiâ âmâ den kârikñe han biwiyenñan yonâk talep aregât keñe miawakmap. Akto hanyenñan tuk tuk koyenñgim âmâ nâñgâ nâñgâyeññande purik gurik akmâ siân kotgâ akmap dâ siân makmâ mulunyekmap.

¹⁶ Are amâ sop humoân âmâ Anutuñe Yesu Kristo aganñdo han nenñan siâ me siâ tiwân yendâp aregât keñe mem tektekñan miap katbiap. Aregât keñe amâ nâ den pat makyenñgiman a hainâk tektekñan miawakbiap. Hain.

Yuda luâk âmbâleñe Mosegât denñe bo lokoyi.

¹⁷ Akto Yuda luâk gâ hin dâmat mon? Nâmâ Anutuñe menekmâ ikinñe den kârikñe are ninñep gât nâñgâre humo aktâp dâmat aregât hin makginñbe.

¹⁸ Gâ Anutugât lau den nângâmat akto bikñande den kârikñe aregât keiñe makgiñi aregât ire agakñe ire bo agakñe nângâm potatmat.

¹⁹ Hain akmâ âmâ gugaet hin dâmat, “Nâ dewun yeñe bokbokñe manmai are âlepñe kewugu yekmâ dâwân kat yekman, akto hândâkñân manmai are âlepñe mem pagaleyekman,

²⁰ akto luâk han kopañe are âlepñe manmâ miwindik yekman akto nanan siâ me siâ âlepñe dâp hekat yengiman, akto den kârikñe aregât keiñe amâ nângâ nângâ akto den bunñe aregât keiñe tatmap dâmat mon?”

²¹ Gâ hain makmat aregât luâk âmbâle bikñe makyengim âmâ guge biwige bo maganmat. Gâ kâmbu bo mem dâm makyengimat guge kâmbu akmat mon?

²² Luâkdâ âmbendâ bo hepun akñet dâm makyengim benñe gâ âmbenge hepunmat mon? Gâ lâpio sârekomatñe lâpio opmânjaet siâ me siâ kâmbu memmat mon?

²³ Gâ Anutugât den kârikñe nângâman dâmat amâ bo lokomat aregât bikñande gekmâ Anutugât den nângâmbiâ gemap.

²⁴ Aregât Anutugât den kulemgoyi bikñe hin tatâp, “Ye Yuda luâk âmbâleñe bâleñe akbiâ aregât Yuda luâk âmbâle bo manmai arekñe yekmâ Anutugât kotñe makmâ sârek kombiâ gemap.”

²⁵ Gâ hâkgân Yudagât tirip tatgiñdâp are den kârikñe lokomenâ bunñe aktâp. Dâ den kârikñe longaimbiâ âmâ hâkge gâiyi are yânñe akbiap.

²⁶ Gârâmâ aregât Yuda tirip bâlâk manmai arekñe Anutugât den lokom âmâ tiripdâ hainare akbai.

²⁷ Hain akmâ tirip bâlâk manmapne den kârikne lokomap yâkne âmâ keige gagaiwiap. Gagaim âmâ gâ Anutugât den kârikne nângâmat akto Yudagât tirip olop manmat gâ den kârikne longaimat aregât hâkge tunmâ keige gagaiwiap.

²⁸ Aregât lâuwâne makbe. Luâk siâ yân hâkne Yuda luâk tirip akbiap amâ hâkneak manbiap. Hain arekne Yuda luâk bunne bo akbiap.

²⁹ Amâ hanne Yuda luâk arekne bunne akbiap. Amâ Yuda luâk arekne hanjân tirip bunne akmap yâkgât amâ Yuda luâk bunne dâmaen. Dâ hâknân den kâriknegât tirip areâk mem manmap are bunne bo. Gârâmâ han biwinân tirip mem manmap arekne amâ Yuda luâk bunne dâmaen. Yâk hain aregât herone amâ luâkgât bo. Anutune nângâmbo âlepne akbiapgât.

3

Agak meme bâlenande Anutugât den bo kombiap.

¹ Akto yu kulengoân are oyanmâ âmâ Yuda luâk âmbâlene âmâ Yuda gâtne bo are bo ewangiyekbaen dâi mon? Me Yuda tirip are yânne aktâp dâi mon?

² Hain bo dâwei. Yuda luâk âmâ siâ me siâ biwirâ yeyengiep. Yâk âmâ Anutune den pat keine keine makyengimbo aregât ambone agi.

³ Gârâmâ Yuda luâk âmbâle biknande Anutu hanyenande bo nânganbiâ aregât hin dâwaen mon? Bo nânganbiâ aregât Anutune makto den kârikne tatmâ gaep are mem bâliâi hain dâwaen mon?

⁴ Are bo dondâne. Anutune makto siâne hin kulengoep,

Anutu, gâ makmenâ âmâ denge bunje ârândânâk akbiâp, are nângâenje huraguwiap. Akto gâ makmâ kotgâ akmâ potatmenâ âmâ siâne denge bo mendo gewiâp. Den are bunje akto luâk âmbâle hârokje hiangimai akto Anutuje konok âmâ bundâk makmap keije are miawaktâp.

⁵ Are oyanmâ gain dâwaen? Bâleje nennande Anutu ârândân manmanjaet keije mem miap panmapgât bâleje aktenje Anutuje aregât hâuje nengimbo ârândân bo akbiap dâwaen mon? Den are amâ luâk nângâ nângâgât dowân maktân.

⁶ Hain bo dondâ. Anutuje bâleje nennaet hâuje bo nengimap dâine gain gain akmâ luâk âmbâle hârok nengât agak memenenne bâleje are mem kepilâwâi?

⁷ Aregât siâne hin dâwiap mon? Hiangi den-nande Anutugât den bunje tângombo kotje patje are humo akmâ sambelewiap, aregât wangât Anutuje nâ bâleje agângât hâuje ninmap? Amâ bo ârândân akmap.

⁸ Akto bâlenân mandenje purik âgâm bunje âlepje miawakbiap mon? Nen âmâ hain bo dâmaen gârâmâ luâk bikjande âmâ Paulomaen hain dâmai dâyi. Aregât hâuje miawakyengimbo ârândân akbiap.

⁹ Aregât gain gain nângâm hêngemgowaen? Yuda luâkne luâk bikje ewangiyekmaen mon? Bo dondâ. Emelâk maktân. Yuda luâk akto Yuda luâk bo nen hârok bâlenjaet hoj manmaen.

¹⁰ Aregât Anutugât den hin tatâp,

“Luâk âmbâle siâ ârândân siâ bo mandâp. Bo dondâje.

11 Hârokñe agak meme âlepñæet keiñe bo nâñgâmai. Akto hârokñe Anutu konmâ kulâgâtmâ bo akmai.

12 Luâk hârokñe Anutu hamianmâ bâleñe akmâ hâkñe hâkñe agi. Siâñe siâ me siâ âlepñe bo akmap. Bo dondâñe.

13 Hanyeñe are momoñe yengât dop. Elewetyeñe purik dâmbo hiangi den gamap. Biwityeñande âmâ hame hewukgât kundat bâleñe mem miawâk panmap.

14 Lauyenân âmâ sait akto gasagât den pikmâ lugum lokom yemap.

15 Luâk yenñuenñe moñet dâm aregât keiyenñande owâiñeâk tâlimai.

16 Akto itiñ gulam meyekmâ welam yenñeâk mem miap panmai.

17 Akto han biwi konok manbiâ biwiyenñe sândugewiapgât pat bo nâñgâmai.

18 Akto Anutu bo nâñganmâ yâkgât hamep bo akmai.” are amâ Anutugât denñe maktâp.

19 Aregât keiñe hin. Den kârikñe arekñe den kârikñe nâñgâmaen nen damun nenñe akmap. Arekñeak keinennñe gagaim, lau nenñe gisapkomap. Akto luâk hârok dosanennñe Anutugâlân miawakmâ metemap.

20 Aregât den kârikñe lokone dâm âi humo mendenñe Anutuñe nenekto bo ârândânñ akmap. Hain gârâmâ benñe den kârikñe arekñe dosa nenñe mem miap panmap. Hain.

Anutuñe nenekto ârândânñ akmapgât den.

21 Dâ hinñe âmâ Anutuñe nenekmâ dosayenñe bo dâwiapgât dâp miawagân miawaktâp. I are

âmâ den kârikñe lokowaengât dop bo. Gârâmâ den kârikñe akto propeteñe kulemgoyi den arekñe makmâ miawagep.

²² Anutuñe nenekto ârândân akbiapgât dâp amâ nen Yesu Kristo nânğanmaen nengât hârok. Siânje me siânje Yesu Kristo nânğanjo ainâk ârândângât dâp miawaganmap.

²³ Akto emelâk nen hârokñe bâleñe akmâ dosagât pat agion, aregât Anutugât egâlian pagalenân ariwaengât dop bo tatnengiep.

²⁴ Aregât hainâk nen hârok Yesu Kristoñe bâleñe nenñe miepgât Anutuñe han kalemñaet akmâ dosa bâlâk dâm menenekmap.

²⁵ Anutuñe dâmbo Yesuñe bâleñe nenñaet akmâ sumbe kato Anutuñe kuk agando bo agep. Aregât nenñe nânğanbaenñe sumbe are mendenñe dosa nenñe bo agep. Anutuñe hain agepgât ikinje agak meme ârândân are miapñân miawagep. Akto ulikñân bâleñe akmâ gayiongât dosa aregât hâuñe dowâk bo nengiep, a hainâk nânğâyion.

²⁶ Anutuñe hain akmap âmâ ârândân amboñe manmap dâm nânğâyion. Dâ Yesu hannennande nânğanđenñe dosayenje bo tatyenğiâp dâwiapgât keiñe hinñeâk tek tegiâkgât hain are agep.

²⁷ Aregât nen nenñaet akmâ nânğâenñe humo akbiapgât dop yendâp mon? Bo. Hâk nânğâ nânğâenñe are nânğâenñe bâliâp. Are amâ den kârikñe lokoyiongât bo miawaktâp, amâ Yesu nânğanđenñe hâknennje akto nânğâ nânğâenñe yânñe aktâp.

²⁸ Aregât den hin nânğâenñe yembiâp. Den kârikñe lokoennje dosayenje bo dâwiapgât dop bo

tatâp. Yesu nângaŋmâ kepilâenŋe âmâ dosanenŋe bo dâwiâp.

²⁹ Dâ Anutu Yuda luâk nengâlâgâk damun mon? Bo. Yâk amâ Yuda gâtŋe bo yâk yengât damun gai.

³⁰ Anutunenŋe konok yâkŋe nen Yudagât tirip mem manmaen me tirip bâlâk manmai nen hârokŋe Yesu nângaŋdenŋe dosayeŋe bo dâm menenekmap.

³¹ Aregât Yesu nângaŋmâ âmâ den kârikŋe nângâenŋe giep mon? Bo dondâŋe. Nenŋe Yesu nângaŋmâ âmâ den kârikŋe tângomaen.

4

Anutunje Abrahamgât luâk âlepŋe dâep.

¹ Akto Yuda nengât hakunenŋe Abraham âmâ wan penianep? dâwaen.

² Abrahamŋe Anutugât den kârikŋe lokombo Anutunje ekmâ dosage bo tatgiŋdâp dâep dâine benŋe Abrahamŋe ikinjaet nângâmbo humo akbop. Amâ Anutugât metenân âmâ bo.

³ Akto Anutugât denân hin yendâp aregâten, “Abrahamŋe Anutu nângaŋdo aregât dosage bo dâm makmâ miawagaŋep.”

⁴ Dâ luâk siâŋe âi mendo âmâ benŋe hâuŋe waŋmaen are amâ han kalem nenŋaet pat bo. Amâ hâu kutigit aŋmaen.

⁵ Dâ luâk siâŋe âi bo mem âmâ Anutunje bâleŋe meme nengât dosa hepunmap yâk nângaŋbiap âmâ ainâk Anutunje luâk aregât nângâm kepilâ kepilâjaet akmâ nângâm âmâ dosa bo tatgiŋdâp dâm magaŋbiap.

⁶ Aregât keiņe Dawidiņe hainâgâk nâņgâm âmâ luâk siâ âmâ âi bo mendo Anutuņe gâunaņmâ dosage bo dâwiapgât yâkgât herone maronegât keiņe hin kulemgœp.

⁷ “Dosa umatņe mem manmai yâk Anutuņe dosayeņe bo tatyenġiâp dâwiapgât are nâņgâmbiâ ukenņe akbiap.

⁸ Akto luâk siâņe bâleņe akmâ gaep yâk Humone nâņganġo dosage olop bo aktât dâm maganġiap yâk nâņgâmbo amâ ukenņe humo akbiap.”

⁹ Akto ukenņe humo are âmâ Yuda tirip olop nengâlâk pat aktâp mon? Me tirip bâlâk yâk yengât olop aktâp? Aregât Abrahamgât pat nâņgâenņe keiņe miawakberâp. Hin. Abrahamņe Anutu nâņganġo Anutuņe ekto ârândân agep. Hain nâņgâmaen.

¹⁰ Akto wan sowân dosage bo dâm maganġep? Tirip olop malewân me tirip bâlâk malewân? Tirip olop malewân ain bo maganġep. Ulikņân Abraham tirip bâlâk mandoân Anutuņe dosaje hepunaņep.

¹¹ Yâk tirip bâlâk malewân Anutu nâņganġo dosaje hepunaņep aregât tirip kulem beirâ wanġep. Anutuņe hain aganġepgât benņe Abrahamņe hinņe tirip bâlâk manmaiņe Anutu nâņganġmaigât dosa bâlâk hinare akmai yâk yengât Eweyeņe ulikņân meme agep.

¹² Abraham hain agepgât âmâ nen tirip olop manmaen nengât Ewenenņe agep. Dâ tirip hâknennân miawagep aregât bo. Abrahamņe hâknân tirip bo talewân âmâ Anutu nâņganġminep, dâp areâk watmâ Anutu nâņganġmaen âmâ benņe Anutu amâ Humonenņe dâenņe ârândân akbiap.

13 Anutuñe Abrahamgât bâgilupñe hân hârok yenñiwian dâm hângât pat katyenñiep amâ den kârikñe loko lokogât akmâ bo. Abrahamñe Anutu nânğanmâ kepilâambo amâ Anutuñe nânğambo ârândân agepgât Anutuñe hângât magep.

14 Amâ hingât. Anutuñe makmâ hâriep aregât pat amâ den kârikñe lokomai yâk yenğât makmâ hâriep dâine benñe Anutu nânğanmaen are amâ yânñe akbop. Akto Anutuñe makmâ hâriep akai yânñe akbop.

15 Aregât keñe hin. Den kârikñe arekñe amâ dosagât hâuñe kaknennân katmap. Dâ den kârikñe bâlâgân amâ den koko are bo miawakmap.

16 Are gârâmâ Anutu nânğanmâ kepilâmaen are nengât miawagep. Amâ wangât? Hingât. Anutuñe ukenñaet akmâ han kalem akmâ makmâ hârembo Abrahamgât kâmolân hârok yâk yenğâlân miawagep. Dâ den kârikñe lokomai gâlâk bo. Abraham amâ nengât hakunenñe dâmaengât Abrahamñe Anutu nânğanđo bunñe agep amâ nen Anutu nânğanđenñe bunñe akmap aregât akmâ nengâlân miawagep.

17 Aregât keñe Anutuñe makto kulemgoep hin tatâp. “Nâñe luâk kâmotñe kâmotñe yâk yenğât Eweyenñe akbiat dâm makmâ hâreginđân.” dâep. Abrahamñe Anutu nânğanmâ hin nânğâm kârigiep, “Anutu amâ momoñe mem golâ katyekmap. Akto siâ me siâ bo yendâp are dâambo miawakmai.” hain nânğâep.

Abrahamñe Anutu nânğâm kepilâ anep.

18 Akto Anutuñe, “Gângât kâlelupge biwirâ miawakbai” dâm maganep, den are nânğambo humo

agep. Akto den are biwiñân mem kârikñe mângim malepgât hânñe hânñe yâkgât bâgilupñe miawakbaigât nânğâep.

¹⁹ Hain akmâ âmâ hombaññe 100 malepgât ikinje hânñe serokñe akto Saragât hânñe gai hainâgâk agep are ekmâ nânğâmbo umatñe bo agep. Akto Anutuñe magep are nânğâm âmâ bo hanoko agep.

²⁰ Akto Anutuñe pat âlepgât magep are nânğâm âmâ han biwiñe bo hogo agep. Âmâ bunñerâm malep. Hain akmâ nânğañmâ kârigem Anutugât nânğâmbo âgâ anđo ikinje biwi kat katgât kârikñe akmâ âgâep.

²¹ Âmâ Anutuñe siâ me siâ makmâ hâriep are bunñe agâk dâmbo âlepñe miawakbiap nânğâep.

²² Hain nânğâepgât akto Anutu nânğañđo bunñe agepgât Anutuñe yâkgât nânğâm âmâ “Dosage bo tatgĩndâp.” dâm makto miawaganep.

²³ Akto Anutuñe dosage bo tatgĩndâp den are Abraham gâlâk bo magep.

²⁴ Nengât gai aktâp. Kembunenñe Yesu Kristo momoñân ba mem agalep Anutu yâk nânğañmaen nengât gai magep. Akto nengât akmâ miawaknengiwiap.

²⁵ Are âmâ Anutuñe makto Yesu dosa nenñæet akmâ moep. Mondo dosa bâlâk manbaengât âmâ Anutuñe momoñânba mem agalep.

5

Anutuñe nengât dosanenñe bo agep aregât biwinenñe mem sândugemap.

¹ Aregât nen Yesu nânğañjongât Anutuñe nenekto dosa nenñe bo agep. Aregât Anutuñe

Humonenne Yesu Kristogât akmâ nângâmbo kuk bo akto biwinenre sândugemap.

² Yesuñeak hângi menengiepgât Anutunje han kalem akmâ damunnenre akto yeukñân manmaen, akmâ maleine Anutugât kulem pagalenre miawaknengimbo ekmâ egâlianbaen.

³ Akto areâk bo. Umatne miawaknengimbo arekne amâ han biwinenre kârikne ketugunengimap aregât bo hâkân akmaen. Aregât umatne miawaknengimboân amâ herone akmaen.

⁴ Akto hâk hilâlâm nângâm bo hâkân aktenre amâ wât kârikne miawaknengimap. Akto wât kârikñande amâ himbimgât egâlianbaengât mem miawaknengimap.

⁵ Himbimgât egâlianngât olop manbaen arekne amâ bo pâpkom anjun anmaen. Amâ hingât. Anutunje ikinje ukennaet akmâ Heak owâineâk nengimapgât Anutugât han kalem are biwinennân lugum totokombo gem tatmapgât bo pâpkomaen.

⁶ Akto Yesu bo nângañion sop ain tân agu agugât dâp bo tatnengiep, sop ain Kristone bâlene meme nengât hâu mem moep.

⁷ Aregât hin nângâen. Luâk siâne luâk siâ ârândânâk manmap are tângowerâm mombiap hainare bo tatâp. Dâ luâk âlepne han kalem akmâ manmap are tângowerâm mombiap hainare konok konok tatmai mon?

⁸ Dâ Anutunje nen bâlene malionân ain han kalemnaet akmâ makto Kristone bâlene nennaet akmâ moep. Mondo ainâk Anutugât han kalemne amâ miawakto egion.

⁹ Akto ire Kristogât hepñæet akmâ dosa bâlâk agiongât Anutugât kuk sopñe miawakbiawân âlepñe tânnengumbo yâkgât akmâ kuk are bo miawaknengiwiap.

¹⁰ Amâ hingât. Nen Anutu gasa aganmâ mandenñe nanñe moepgât akmâ han kalem aknengiep amâ âi humo. Are hinñe Anutuñe han kalem aknengiewân amâ manmanñæet akmâ manman kârikñân katnenekbiapgât amâ âi owâiñe.

¹¹ Akto areâk bo. Kembunenñe Yesu Kristoñe Anutu olop mendunenegepgât aregât yâkgât akmâ Anutu yâk makmâ egâlian aganmâ heronje akmaen.

Adamñe bâleñe agepgât momogât dâp miawagep.

¹² Aregât hin nângâne. Luâk Adam konokñe bâleñe agepgât bâleñe keiñe keiñe hânân miawagep. Hain akto bâleñæet momo miawaknengiep. Akto luâk hârok bâlim meteyiongât momogât patñe luâk hârok katip nenguep.

¹³ Akto den kârikñe bo miawaktoân bâleñande ulikñân miawakmâ yiep. Dâ den kârikñe bo talep amâ yân yem gaep.

¹⁴ Gârâmâ momoñe Adamgâlân keiñe katmâ luâk manmâ gayi yâk damun yengum gam mando âmâ Mose miawagep. Amâ Adamñe den koko agepgât hainare bo agi yâk yengâlân miawagep. Akto Adam amâ luâk siâ beirâ miawakbiapgât tirip akmâ malep.

¹⁵ Dâ han kalemñe âmâ den kokogât dop bo aktâp. Luâk konokgât den kokonæet biwirâñe mom

hilip aguyi. Hain akto Anutugât han kalemñe amâ luâk konok Yesu Kristo yâkgât âlepñæet akmâ Adamgât den koko ewangim luâk biwirâ nengâlân miawagep.

¹⁶ Aregât lâuwâñe makbe. Luâk konok Adam yâkñe bâleñe agepgât nen hârok den âiân miawak-tenñe dosanenñe miawakbiap. Dâ bâleñe nenñe humo aktoân âmâ Anutunje han kalem nengiep arekñe nen dosanenñe boân manbaengât mem miawaknengiep. Aregât Anutunje han kalem nengiep are akto luâk konokñe bâleñe akto miawaknengiep are amâ dop yetñe konok bo.

¹⁷ Amâ Adam luâk konokñe den koepgât momoñe damunnenñe akmâ gaep. Aregât Anutunje han kalemñe yem âgâwiapgât akto dosa bâlâk manman are nengiwiap. Aregât amâ nenñe luâk konok Yesu Kristo yâkgât akmâ manman kârikñân kembu akmâ manbaen.

¹⁸ Aregât hin. Luâk konokñe den kom malepgât luâk hârokñe hememgât pat agion. Aregât luâk konokñe ârândân mando dosa bâlâk manbaengât pat agion.

¹⁹ Luâk konokgât den kokogât Anutunje nenekmâ dosa luâk dâm nengonlep. Hainagâk luâk konokgât den loko lokogât amâ Anutunje nenekmâ dosa luâk bo dâm nengonlep.

²⁰ Akto den kârikñe amâ bâleñande sambeleâkgât tânâmñân miawakto ekbaengât. Dâ bâleñande sambelem miawakmâ âgâmbo ainâk Anutugât han kalem arekñe sambelem ewangim âgâep.

²¹ Dâ aregât luâk âmbâle agak meme bâleñe akmâ manbiâ momo dondâ arekñe meyekto gayi. Gârâmâ luâk âmbâle bikñande Yesu Kristo Hu-

monenñe yâkgât akmâ nânğanmâ manmaen nen Anutugât han kalemñe damunnenñe akmâ dosa bâlâk menenekmâ manman kârikñân katnenekbiap. Are âmâ Kristo Kembunennenñe yâkgât akmâ miawakbiap.

6

Yesugâlân dewatiyion.

¹ Aregât gain dâweren? Anutugât han kalemñe miawakmâ sambelem ariwiapgât bâlenñe aktenñe ârândân akbiap. Hain dâweren mon?

² Hain bo. Bâlenñet akmâ moyion nenñe gain gain gaetñe bâlenñe lâuwânñe akmâ manmaen?

³ Aregât ye hin bo nânğai mon? Nen tu पुलिनंगियान् âmâ Yesu Kristogâlân dewatiyion. Dewatim âmâ yâkgât momoân dewatiyion.

⁴ Hain akmâ dewatienñe âmâ Kristo olop han nenguep. Hain akto Ewenñe Anutu yâkgât pagalenande Kristo mem agato momoñânba agalep hain agâk nen golâ akmâ manman irakñe ain manbaen.

⁵ Aregât lâuwânñe makbe. Anutunñe nanñe moep aregât pat nengiep. Hain nengim âmâ Yâkgâlân dewatinenegep. Aregât akmâ Yesunñe momoñânba agalep dop hainâk mem agatnenekbiap.

⁶ Aregât hin nânğamaen. Han tâmbânñe nenñe Yesu olop lâwinân moep dop hainâk bâlenenennñe bo agâkgât miawagep. Hain miawakto bâlenñe nenñande bo damunnenñe akbiapgât dâp miawagep.

⁷ Âmâ hingât luâk siâ mondo âmâ bâlenande lâuwânñe bo damunñe akbiap.

⁸ Akto nen âmâ Kristo olop moyion aregât yâk momonânba agatmâ manmâ âgâwipgât nen âkâ yâk olop manmâ âgâwaen. Hain nângâmaen.

⁹ Akto Kristogât hin nângâmaen. Yâk momonân ba agalepgât lâuwânje bo mombiap. Akto momogât pat arekne lâuwânje bo damunne akbiap. Bo.

¹⁰ Yâk moep amâ bâlenjaet sop konok mondo bo agep are. Akto hinne mandâp amâ Anutugât akmâ mandâp.

¹¹ Aregât ye hainâgâk bâlenjejaet pat moyigât Yesu Kristo yâk olop Anutugât akmâ manmâ âgâniâm dâwei.

¹² Aregât bâlenjande hâkyenje damunne akbopgât nângâmâk manbei. Akto hâkyenje egâlian bâlenjaet hâwâtyekbopgât are gai nângâmâk biwiyenje damunne akmâ manbei.

¹³ Hain akmâ hâkyenje bâlenjaet pat hon bawa bo aganbiapgât hin akbei. Anutunje momonânba oloŋ yekmâ manman âlepñân katyegepgât hâk biwiyenje Anutugât kotgâm wanbiâ âlepjaet hon manbiâp.

¹⁴ Amâ hingât. Ye den kârikjande bo damunyeŋe akmâ denân katyekmap. Bo. Anutugât han kalemjande damunyeŋe akmapgât bâlenjande luâk kembu bo akyenjiwiâp.

Agak meme âlepne aregât hon bawa aganmaen.

¹⁵ Aregât ire gain akbaen? Anutugât han kalemân manmâ arienne den kârikjaet horat hulaj agepgât bâlene mendenne ârândân akbiap mon? Amâ bo.

¹⁶ Luâk kembu siâ han biwiyenje hikom kinmâ lau lokoanbaine yâkgât hon aganmâ âi

meanbai. Bâleŋande damunyeŋe akto aregât hoŋ mananmâ ageine mom hilip aguwâi me lau loko lokoŋe damunyeŋe akto yâkgât hoŋ manmâ âgâmbiâ Anutuŋe yekto huraguwiâp. Are nânġai mon?

¹⁷ Ye bâleŋaet hoŋ manmâ gayi are bo agep. Dâ luâk bikŋande Yesugât keiŋe makyenġimbiâ âmâ pâŋân mem han yeŋande nânġâm kepi lâm lokomai aregât Anutu mepaiŋe meanbaen.

¹⁸ Dosa yeŋande wârakmâ mem ge katyekto aregât hoŋ bawa akmâ mali are Anutuŋe kom mem oloŋyekmâ agak meme âlepŋân katyekto aregât hoŋ bawa agaŋi.

¹⁹ Han tâmbâŋe yeŋe yeukŋe aregât luâġân siâ me siâ yendâp aregât dop katmâ makyenġiân. Ye ulikŋân hâk biwiyenġe egâlian bâleŋe aregât hoŋ agaŋbiâ humo akto gulip mali. Aregât sop uŋak âmâ hâk biwiyenġe ârândânġât hoŋ bawa agaŋbiâ humo akto han ârândânġak akmâ manbei.

²⁰ Ulikŋân bâleŋaet hoŋ maliân ain ârândânġ man-mangât horat are bo yeyenġiep.

²¹ Akto sop ain wan bunġe miawakyeŋġiep? Bo. Aregât kakŋân momo miawak yeŋġiwiapġât pat. Dâ hinġe are nânġâm âmâ aŋunġe olowâk mandâi.

²² Bâin. Sop hinġe amâ bâleŋaet tâk hulaŋdo Anutugât hoŋ manman agi mandâi. Hain akbiâ han irakŋe akto agak meme ârândânġ miawak yeŋġiep. Dâ beirâ âmâ manman kârikŋe mem manbai.

²³ Bâleŋaet hâuŋe âmâ momo membaen. Dâ Anutuŋe han kalemŋaet akmâ Kembu nenġe Yesu Kristo yâkgât akmâ manman kârikŋe nengimbo mem manmaen.

7

Yesu moepgât den kârikjaet tâk hâreaņep.

¹ Galama, den kârikjaet keiņe nâņgâmai ye hin makyengiwe. Ye hin bo nâņgâmai mon? Nen mandenņe den kârikņe arekņe damun nenņe akmap. Dâ mombaenân âmâ den kârikņe arekņe bo damun nenņe akbiap.

² Aregât âmbâle siâņe luâk siâ mendoân den kârikņe hin kalaņep, luâk hepunbiapgât dop bo yendâp. Dâ luâkņe mondo den kârikņe makmâ hâreaņep are hepunbiapgât dâp talanbiap.

³ Aregât luâkņe golâ mandoân ain âmâ hepunmâ luâk siâ mendo âmâ âmbâle bâleņe dâm konmaen. Dâ luâkņe mondo âmâ luâkdâ âmbendâ menduyelegep tâk are hâreaņep. Aregât luâk siâ membiawân ain mem hepun hepongât dosa bo membiap.

⁴ Galama yengât keiyeņe hainâk yendâp. Kristogât hâkņe mondo ain den kârikņe aregât tâk hâriep. Hârembo den kârikjaet moyi. Are âmâ ambo siâgât agi. Anutuņe nanņe momoņânba agalep mandâp yâkgât kâmot agi. Aregât nen Anutu bunņe peniaņiongât.

⁵ Dâ ulikņân manman tâmbâņe malion sop ain den kârikņe arekņe egâlian bâleņe kâlâpņe waito hâk biwinenņân âiņe mem malep. Hain aknengimbo momogât bunņe mem peniaņion.

⁶ Dâ hinņe amâ den kârikņe arekņe bo damun nenņe akmap aregât tâkņe hulaņ nengiewân âmâ den kulemgât dâp tâmbâņe bo watmâ âmâ Heakgât dâp irakņe tâlim arimaen.

Bâleņande hilip nengumap.

⁷ Aregât gain dêweren? Den kêrikne ire amâ bâlenje mon? Hain bo. Den kêrikne bo tatâp dêine nâ bâlenjaet keine bo nângâm kotgâwom. Den kêrikne arekne hin makmâ miawakniñdâp, “Egâlian bâlenje bo nângâm egâlianben.” den are bo tatâp dêine egâlian bâlenje bo nângâwom.

⁸ Gârâmâ bâlenje are amâ den kêrikne arekne tân agaŋdo hanne hâwâto egâlian bâlenje keine keine miawakniñep. Amâ den kêrikne arekne bo yendâp dêine bâlenjande yân limbâp agum yembop.

⁹ Nâ uliknân den kêriknjaet dêwân bo malân ain amâ manmanne miawaknengiep. Aregât hamiñân den kêrikne arekne penâniñdo bâlenjande biwinân âi mendo momogât dêwân ariân.

¹⁰ Den kêrikne arekne manmangât dâp makmâ miawakmap arekne purik dâm momogât dâp miawakniñep.

¹¹ Amâ hingât. Bâlenje are amâ den kêrikne arekne tângombo kêrikne akmâ heniñmâ nugumbo momo hinare agân.

¹² Aregât hin nângân. Den kêrikne amâ dosa bâlâk. Akto Anutuñe wan me wan makmâ hâriep den are hainâk amâ dosa bâlâk akto Anutuñe nângâmbo âlepne akto ârândân akmap.

¹³ Aregât hin dêwe mon? Den kêrikne amâ âlepne arekne konok nâ nugumbo momogât dâp miawakniñep mon? Hain bo. Bâlenjenande den kêrikne âlepne aregât akmâ momone nuguep. Amâ hingât. Anutuñe wan makmâ hâriep den aregât akmâ bâlenjenaet keine nângâm hengemgore bâlenjaet hândâkne dondâ bâlenje miawakmâ kinbiapgât.

Bâleñande hikom katnenekmap.

¹⁴ Dâ nenâmâ hin nâŋgâmaen. Den kârikŋe amâ Heakgât pat. Dâ nâmâ bâleñæet hoŋ agaŋmâ hângât pat manman.

¹⁵ Nâ agak memene nâŋgâwerâm aktere purik gurik agep. Amâ hin. Nâ siâ me siâ akberâre umatŋe akto bo akman. Dâ siâ me siâ sârekoman are amâ akman.

¹⁶ Akto wan me wan sârikoman are akman âmâ benŋe hin nâŋgân, den kârikŋe are nâŋgâre âlepŋe akmap dâman.

¹⁷ Aregât wan akmâ bâliman are amâ nâ nune hangât bo akman. Bâleñande hanân yem hâwâtneko akman aregât.

¹⁸ Nâ keine hin nâŋgân. Agak meme âlepŋæet egâliŋman are amâ membiangât dâp bo tatniŋdâp, aregât hâknân wan me wan siâ âlepŋe bo yendâp. Hain nâŋgân.

¹⁹ Amâ hin. Nâ wan me wan siâ âlepŋe akbian dâm kinmâ âmâ bo akman. Dâ siâ me siâ bâleŋe bo akbian dâm kinmâ âmâ akman.

²⁰ Bâleŋe bo akbian dâm makmâ hanâk akman amâ nunak bo. Bâleŋe biwinân tatmap arekŋe huŋgunniŋdo hanâk akman, hain nâŋgân.

²¹ Aregât nâŋgâlân hin miawakmap. Siâ me siâ âlepŋe akberâre âmâ bâleñande mete katniŋmap.

²² Nâ han biwinande Anutuŋe den kârikŋe kalep are nâŋgâre ârândâŋ akto heronŋe akman.

²³ Dâ hâknande âmâ nâŋgâ nâŋgâne are kondo gembo bâleŋe hâknân manmap arekŋe hiko neko umatŋân mandân.

²⁴ Aregât mesak gosak akman. Gâuk niŋande hâkne momogât pat agakŋe mem kotdâ nekbiap?

Amâ hin.

²⁵ Nâmâ Yesu Kristo Humo nenñe yâkgât akmâ Anutu mepainje meman. Bâin. Nâ Anutugât den kârikñe are nângâre ârândân akto nângâ nângânande hoñ agañman. Dâ hâknande âmâ bâlenjaet kârikñe hoñ agañman.

8

Yesunje dosanenñe puliepgât yâk nângâm kepilâ anbaen.

¹ Aregât Yesu Kristo olop manmaen nen âmâ Anutunje bâlenjaet hâuñe bo makmâ kotdâ nengiwia.

² Amâ hingât Anutugât Heak arekñe Yesu Kristogât manman are nengiep pat arekñe bâlenjaet tâk akto momogât tâk hâriep.

³ Akto den kârikñe are han tâmbânje nenñande kârikñe kondo gembo nengâlân âi mem âsinenekto bo agep. Aregât Anutunje nanñe luâk hainare ak dâmbo luâk akmâ gem mando bâlenjaet akmâ nanñe kuk agañdo moep.

⁴ Mondo âmâ den kârikñe loko loko âlepñe miawaknengiep. Nen han tâmbânjaet dâp bo watmaen. Bo. Amâ Heakgât dâp tâlimaen nengâlân den kârikñe loko loko âlepñe mendenñe huraguwiapgât dâp miawaknengiep.

⁵ Hâkyenjaet dâp tâlimai yâkñe âmâ hâkgât nângâmbiâ humo akmap. Dâ Heakgât dâp tâlimaen nenñe âmâ Heakgât siâ me siâ aregâlâk nângâenñe humo akmap.

⁶ Hâkgâlâk nângâm manbiâ âmâ momo miawaknyengimbo hilip aguwai. Dâ Heakgât

nângâenñe humo akbiap amâ manman âlepñe akto biwi sânduk membaen.

⁷ Amâ hingât. Luâk siânñe hângâlâk nângâmbo humo akmap yâkgât nângâ nângânñe Anutu gasa agañmap. Nângâ nângânñe Anutugât den kârikñaet amukñân tatbiapgât dop bo tatâpgât den kârikñe are hâkânñe akmâ panmap.

⁸ Amâ wangât? Hingât. Hâkgâlâk nângâmai yâk Anutunñe yekmâ hâkânñe akmap.

⁹ Dâ ye Romagâtñe amâ Anutugât Heakñe arekñe hanyenân tatmâ manmapgât hâkgât patñande bo damun yenñe akmap. Amâ Heak olop menduguakmâ manmaigât. Dâ siânñe Kristogât Heak bâlâk manbiapñe yâkgât pat bo mem manbiap.

¹⁰ Dâ Kristonñe hanyenân manmawân hâkyenñe bânñe akmâ momonñe akyenñimap gârâmâ han otne yenñe amâ dosa bâlâkgât golâ akmâ manmap.

¹¹ Akto Yesu momonânba mem agalep Anutugât Heakñe hanyenân tatmap arekñe Kristo Yesu momonânba mem agalep dop hainâk hanyenân Heakñe mandâp yâkgât akmâ hâkyenñe momonñe are hainagâk mem golâ katbiap.

Heakñe menenekto yâkgât agion.

¹² Galalupne, nengât hâu yendâp aregât hâknennñe bo nângâmâk manbaen. Akto hâkgât agak meme bo mem manbaen.

¹³ Amâ ye hâkgât agak meme watmâ manbai âmâ hilip aguwai. Dâ Heakgât kârikñân agak meme are kombiâ gembo âmâ manman âlepñân manmâ âgâwai.

14 Aregât keiņe hin. Anutugât Heak arekņe sokoyekto manmai yâk âmâ Anutuņe nan barat dâm yeņgonmap.

15 Anutugât Heak yeņgiep are âmâ hoņ manmanlupņe manmâ hamep akņetgât bo. Nan barat bunņe manņetgât Heak yeņgiep. Aregât akmâ Ewenenņe âlepņe dâm konmaen.

16 Amâ nen Anutugât nan barat manden den are âmâ Heakņe biwinenņân makmâ humolembo nâņgâmaen.

17 Nanņe baratņe mandengât Anutuņe bâtņe bâiņe nengiwiapgât dop miawaknengiep gât Kristo olop mendugum damun akbaen. Amâ in hânân yâk olop dâtņe metņe kakņân manbaen âmâ âlepņe yâk olop egâlian pagaleņe âlepņân nen hârogâk manbaen.

Manman âlepņe aregât lâmgom manmaen.

18 Galalupne. Nâ hin nâņgân. Himbimân Anutuņe egâlian âlepņe nengiwiap arekņe hânân hâk hilâlâm umburuk yendâp are ewangiâp aregât hâk hilâlâm gât nâņgâenņe yânņe akbiâp.

19 Anutugât nan barat manmaen nen pagaleņe miawaknengimbo tektekņân manbaengât siâ me siâ liulep arekņe aregât imbianmâ lâmgom manmai.

20 Amâ hingât. Anutuņe siâ me siâ liulep are mom bâle bâlegât kâlegen katyegep. Are amâ yeņgât hangât bo. Anutuņe siân wan âlepņe miawakbiap aregât lâmgom manbaigât lope kâlegen katyegep.

21 Amâ hingât. Beirâ wan me wan liulep are gai mom hilipaguwaigât tâkņe guņmâ panmâ kârikņe

akmâ Anutugât nanne baratne nengâlân egâlian âlepñân dewatinenekbai. Haingât.

²² Nen aregât hin nângâmaen. Anutuñe kotñe siâ siâ hârok ketuguep are hârokñe âmbâleñe nanan memberâm hâk hilâlâm nângâm kamboñmai dop hainâk akmâ lâmgom manmâ kamboñmai.

²³ Akto wan me wan liulep areâk bo akmap. Nenâkai, Heakñe biwinenñe bunñe aknengimap Anutugât nan barat manden aregât keiñe mi-awaknengiâkgât akto Anutuñe hâk nenñe mem hulanmâ hengemgom mem tek tekñân katnenekbi-apgât sopñe lâmgom manmâ han nenñande mesak gosak akmâ umburukñe akmaen.

²⁴ Hain akmâ lâmgom manmaengât amâ Anutuñe hengem nenguwiapgât pat miawak nengiep. Dâ siâñe siâ lâmgom manbiapñe amâ wan me wan ekbiawân lâuwâñe bo lâmgom amâ biwi owâi bo akmap.

²⁵ Gârâmâ nenâmâ hinñe wan bo ekmaen are lâmgomaen amâ biwinenñe owâiñe akto bo hâkân akmaen.

Heakñe tânnengumap.

²⁶ Akto dop hainâk Heakñe gai nen yeukñaet akmâ tân nengumap. Nen hin me hain ulilanñenñe ârândân akbiap are amâ bonângâm kotgâmaengât Heakñe han nenñe mem owâimbo den luâkñe bo nângâmaenñe are maktenñe miawakto Anutuñe nângâmap.

²⁷ Akto Anutu biwinenñân ekmapñe amâ Heakgât den nângâmap. Amâ Heakñe nen Anutugât kâmot nengât akmâ Anutuñe wan

me wan makmâ hâriep are nângâmap areâkgât ulilarṇmap.

²⁸ Akto areâk bo. Nen hin nângâmaen. Anutu han nennande nânṇaṇmaen nengât akmâ wan me wan miawaknengimap are hârok mem tân nenguwiapgât mânginenekmap. Amâ yâkṇe han kalemṇaet akmâ oloṇ nenegep nengât.

²⁹ Ulikṇân Anutunṇe han kalemṇaet akmâ potatnenegep gât Nanṇaet tirip akbaengât makmâ hâriep. Akto emiṇe gariṇe biwirâ aktenṇe ikiṇe âmâ teunenṇe humo ulikṇân gâtṇe akmâ manbiapgât makmâ hâriep.

³⁰ Anutu luâk âmbâle ulikṇân nângâm hengemgom potat nenegepgât nengonmâ oloṇnenegep. Nengonmâ oloṇ nenegepgât dosa nenṇe bo aktâp dâep. Dosa nenṇe bo aktâp dâep gât egâlianṇe âlepṇe nengiep.

Anutugât han kalemânba siâ me siâṇe bo hilip-nenguwiap.

³¹ Den are keiṇe gain gain yendâp dâweren? Anutunṇe gala bo aknengimap dâine gasalupnennande dondâ yeukṇe aknengimbiâ hilip aguwâen.

³² Anutunṇe ikiṇe Nanṇe bo gangerâm dum-nennân kilâkgât huṇṇun aṇdo giep are amâ âi humo. Dâ wan me wan yâkgât akmâ nengiwiap amâ owâiṇe.

³³ Anutunṇe ikiṇak dosa nenṇe bo aktâp dâmap aregât yâkgât kâmotlupṇe nen niṇande denân katnenekbop?

³⁴ Akto Kristo Yesu ikiṇak moep. Akmâ moewâk bo. Yâk momonânba agatmâ Anutugât bâṭṇe bungen âgâ talepgât nengât akmâ Anutu ulilarṇmap,

aregât niñande denân katnenekto dosa nenñe mi-
awakbiap?

³⁵ Akto Kristogât han kalemânba wan arekñaetñe oloñ nenekto yân manbaen? Amâ hâk hilâlâmñe me dâtñe metñande me gasalupnennñande me mop manmanñe me hanokoak manmanñe me tembe bugâñe arekñe? Are hârokñe Kristogât han kalemânba oloñnenekbiapgât dop bo.

³⁶ Amâ Anutunje aregât magep hin tatâp,
“Anutu gânggât akmâ hâk hilâlâm nâñgâenñe hok-
boâk hokboâk gasalupnennñande itin gulam
menenekmai. Akto bau kom gâimaen aregât
dop hainâk aknengimai.”

³⁷ Hain arekñe bo mem ge katnenekbiap. Bo.
Yesunje han kalem akmapgât kârigem kârikñe
humo peniañmâ kinmaen.

³⁸ Aregât hin nâñgâm kârigeân. Momonje me
manmanñe me anelone me luâk kembunje me
hinñe miawakmapñe me beirâ miawakbiapñe me
siâ me siâ kârikñe arekñe

³⁹ me siâ siâ âgâñe me siâ siâ gegenje me wan
me wan Anutunje liulep arekñe Anutugât han
kalemñande Yesu Kristonje katip nengumap ain ba
bo oloñnenekbiap.

9

Paulonje Yuda luâk yengât yai nâñgâep.

¹ Nâ Kristogât akmâ den bunñe maktere
nâñgâñet. Heakñe hanne mem pagalembo nâñgâm
henngemgom makyenñgiwe.

² Nâñe nâñgât ginbailupne Yuda gâtñe yâkgât akmâ nâñgâyengire biwine umatñe dondâ akmap.

³ Aregât hin nâñgân mon? Anutuñe Yuda luâk galalupne yâkgât akmâ hepun nekmâ âmâ meyek-biap are nâñgâm owâiân.

⁴ Yuda luâk nengât kotnenñe siâ Israegât kâmotlupñe are Anutuñe nâñgât mândulupnerâm ikinjaet pagaleñe hekatyengiep. Hain akmâ âmâ Anutu olop dewatiwaigât pat akto den kârikñe makmâ miawak yengiep. Akto sumbegât emetñe aregât hin akñetgât dâpñe keiñe hekatyengiep. Akto siân wan me wan hârok yengiwian dâm makmâ hâre yengiep.

⁵ Dâ Yuda nengât hakulupnenñe amâ luâk kautñe mali. Akto Anutuñe nanñe hungunañdo giep are amâ nengât hutnenñânba miawagep. Yâk âmâ wan me wan hârok nengât kautñe malep, yâk âmâ Anutu aregât nenñe nâñganñenñe humoñe humo kârikñe talanbiap. A bundâk.

⁶ Dâ ya makyengian aregât hin bo dâwaen, “Yuda luâkñe wan akmai aregât Anutugât den yeukñe agep.” bo dâwaen. Israe gâlân ba miawagion âmâ Israe luâk bunñe hârokñe ârândân bo agi.

⁷ Dâ Abrahamgât uliklupñe miawagi are âmâ kâmotlupñe bunñe gai bo agi. Gârâmâ aregât Anutuñe makto Moseñe hin kulengoep, “Abraham gângât nanñe Isakagât kâlegenlupñe amâ gângât pat akbai.”

⁸ Den aregât keiñe hin tatâp. Abrahamgât kâlegen gâtñe hârok âmâ Anutuñe mândulupnerâm bo yengonmap. Anutuñe makmâ hâriewân miawagi yâkñeak Abrahamgât kâlelupñe bunñe

agion.

⁹ Aregât Anutugât denŋe hin talep a bunŋe agep, “Hombaŋ kakŋân sop miawakto Sara nanaŋ mem mandoân purikatbian.”

¹⁰ Akto areâk bo. Rebeka âmâ luâkŋe hakunenŋe Isaka yâk olop manmâ nanaŋ lâuwâ megolak tepŋe agep.

¹¹ Tepŋe akto nanaŋ lâuwâ bo miawakmâ maliat ain bâleŋe me âlepŋe bo agialân Anutuŋe yâk yetgât hin magep, “Teuŋande emiŋaet hoŋ manbiâp.”

¹² Amâ Anutu ikiye hannaet den are kârikŋe agâk gât nânġâm nanaŋ manman yetŋaet bo makmâ kârigiep. Ikiŋaet hannaet mem potat yelekmâ kinmâ hain magep.

¹³ Aregât Anutugât den bikŋe hin tatâp, “Nâŋe Yakobo âmâ han kalem agaŋmâ okot âlep nânġân. Dâ Esau âmâ hâkâŋ agaŋdân.”

¹⁴ Akto aregât gain dâweren? Anutuŋe wan me wan mendo bo ârândânġ akmap? A borondânġe.

¹⁵ Ulikŋân Anutuŋe Mose hin magaŋep,

“Luâk me âmbâle siâ are okot âlep agaŋdere ârândânġ akmap. Akto luâk me âmbâle siâ han kalem agaŋdere ârândânġ akmap.” dâep.

¹⁶ Aregât keiŋe hin. Anutuŋe luâk hanyenjaet me âiyenjaet bo nânġâyengimap. Anutu ikiye han kalemŋaelâk nânġâm makmâ potat nenekmap.

¹⁷ Aregât keiŋe Anutugât denŋande Parao hin magaŋep, “Nâ gâŋġâlân kârikŋene mem miap pandere hân ârândânġ ariâkgât dâm kat gegân.”

¹⁸ Aregât Anutuŋe âmâ luâk siâ han kalem agaŋberâm âmâ âlepŋe agaŋbiap. Dâ luâk siâ han

biwiŋe gisapkoanberâm âmâ âlepŋe gisapkoanbiap.
Amâ ârândân akmap.

Yuda luâkŋe Anutu hamianji.

¹⁹ Are oyaŋmâ yengâlân gâtŋe siâŋe hin
makniŋbiap mon? “Anutuŋe wan me wan
akberâm dâmbo luâkŋe bo miawagâk gât horat
kalanbiapgât dop bo tatâp aregât Anutuŋe luâk
nengât nâŋgâmbo bâlimap are bo ârândân aktâp.”
dâm makniŋbiap mon?

²⁰ Wei gâmâ luâgâk. Wangât Anutu den hâuŋe
magaŋbiat? Aregât den dopŋe hin makbe. Wangât
umbâŋe luâk umbâ mângimap are hin magaŋbop,
“Gâ wangât tiripne hain are mânginegen?”

²¹ Aregât umbâ mângimap luâk arekŋe hân
numŋe mem umbâ bikŋe luâk yâk yengât pat
mângiwop. Dâ bikŋe dua bau yâk yengât mângimbo
ârândân akbiap.

²² Amâ Anutuŋe kuk akto kârikŋeŋe tektekŋân
kato ekbaigât umbâ bikŋe hogom panyekbiapgât
nâŋgâyengim bo hâkân akyengiep.

²³ Hain akyengim umbâ bikŋe han kalamŋaet
pat maleine beirâ egâlian pagalenân kâmot
katnenegâk gât nâŋgâmbo yendâp. Umbâ
are nengâlân egâlian unsambe nengiepgât
menekmâ manmap.

²⁴ Dâ aregât amâ Yuda luâk âmbâleâk bo. Hân
siâ siâ Yuda luâk bo manmai aregât nen han
kalemŋaet pat aknegât oloŋ nenegep.

²⁵ Akto Anutuŋe propete Hosea hin magaŋdo
kulemgoep,

“Luâk kâmot ambo bo akyengiân yâk nâŋgât luâk
âmbâlelupne yengonmâ makyengiwan. Akto

âmbâle okot han kalemne bâlâk malep yâk nângât dâtâne dâm konbian.”

²⁶ Akto den siâ hin,

“Nâne ye nângât luâk âmbâlelupne bo dâm makyenjiân ain kotyene Anutu manman ambonaet nanne baratne yengonbian.” dâep.

²⁷⁻²⁸ Dâ areâk bo. Yesaianje Israegât hin magep, Kembunje hânân denjaet bunje dowâgâk mem miap pando kârigewiap aregât Anutune hin dâep, “Israegât kâlelupne haruân nupi yendâp aregât dop miawakmâ manbai nâne hutnânba konok konok mem olojyektere manman âlepjân manbai.” dâep.

²⁹ Akto Yesaianje beirâ miawakbiapgât hin magep,

“Humonenne kâmot kârikne Humo Amboyenande hutnennânba konok konok bo oloj nenekto dâine âmâ Sodom Gomora itinj gulam agiat hain are akbâen.”

Yuda luâkne âlepne aknegât ewum hâumgoyi.

³⁰ Aregât ire gain dâweren? Hin mon? Luâk Anutugât kotne bonângâmaiye âlepne akjetgât bo nângâmâk watmâ manmai yâk âlepne manmaigât memai. Are âmâ Kristo nângaṇmaigât memai.

³¹ Dâ Israe luâk den kârikne lokom kinbiâ Anutune yekto huraguâkgât kârikne agi. Kârikne akmâ den kârikne bo lokom âlepne bo akmâ âmâ umale agi.

³² Âmâ wangât? Hingât. Yuda luâk âmbâle arekne Kristo nângâ aṇbaigât pat bo wali. Yân agak memeyene aregât âlepne aknegât hain agi. Are

amâ dâwân kât yiep ain keiyenê kondo kâwâwân kârâyi.

³³ Aregât Anutuñe hin makto Yesaianê kulemgoep,

“Nângâi. Nâ Sion gimbânân kât siâ katere tatbiap. Arekñe keiyenê erâambo peñ panyekbiap. Akto kât humo katberân ain kom hewewen panbai. Dâ siânê nânğanbiap âmâ bo pâpkom anjun angiwiap.”

10

Yuda luâkñe Anutugât den hâkânê dâyi.

¹ Galama, nânğât kâmot Yuda luâk âmbâle are Anutuñe meyekbiapgât hannande dondâ hâwât nekto Anutu aregât ulilanman.

² Amâ yâkñe Anutugât âi mendenñe huraguâk dâm kârikñe akmâ manmai. Dâ amâ pâpkom kinmâ akmai.

³ Yâkñe Anutugâlân ba dosa bâlâk aknegât dâp yendâp aregât pâpkomai gât yenek âlepñe aknegât âiñe kârikñe memai. Hain akmâ Anutuñe yekto huraguâk gât dâp hâkân akmai.

⁴ Aregât keiñe hin. Kristonê den kârikñe are lokombo bo agep. Aregât luâk âmbâle siânbañe Kristo nânğanbiâ âmâ Anutuñe dosayenê bo dâm yenğonmap.

⁵ Aregât Mosenê hin kulemgoep, “Luâk siâ den kârikñe are hârok lokore Anutuñe nekto huraguâk gât manbiap yâkñe den kârikñe hârok lokombo âmâ âlepñe manmanân manbiap.”

⁶ Dâ Kristo nânğanbiâ Anutuñe yekto huragumap gât den hin yendâp, “Niñande himbimân âgâm Kristo mem oloñdo gewiap?”

⁷ Me ninjande hememân gem Kristo momonje yâk yenġât hutyenânba oloġdo gawiap? Ye hain bo dâwai.”

⁸ Anutuġe magep hin tatâp, “Anutugât denġe kâlewângen bo tatâp. Enemân akto biwigân yendâp.” Are amâ biwi kat katġât den pat âlepġe nânġâġetġât makyenġimaen.

⁹ Amâ Yesu amâ Kembune dâwiat akto biwigân Anutuġe Yesu momonânba mem agalep dâm nânġâm kepilâwiat benġe Anutuġe henġem gugumbo manman âlepġân manbiat.

¹⁰ Aregât han nennjande Yesu nânġanġmâ âmâ dosa bâlâk manmaen. Akto launennjande makmâ miap panmâ mandenġe Anutuġe henġem nengumap.

¹¹ Aregât Anutugât dennjande hin dâep, “Siânġe nânġanġbiap âmâ bo pâpkom anġun anġiwiap.”

¹² Amâ Yuda me Girik luâk potat potat bo yendâp. Humo Kembu konokġe amâ hârokgât Kembunenġe mandâp. Yâkġe luâk me âmbâle bikġande yâkgât kotġe konbiâ âmâ ainâk han kalem akyenġim wan me wan âlepġe potatmâ yenġiwiap.

¹³ Aregât Anutugât dennjande hin dâep, “Niġe me niġe Kembu kondo âmâ ainâk Anutuġe mem henġemgo anġbiap.”

¹⁴ Gârâmâ luâk âmbâleġe amâ Kristo bo nânġanġmai amâ gain gain kotġe konbai? Akto siânġe Kristogât keiġe bo makyenġimbo âmâ gain gain nânġanġbai? Akto den pat âlepġe makmaen nengâlân ġâtġe konokġe bo arim makyenġimbo âmâ gain gain den pat âlepġe nânġâwai?

¹⁵ Akto Anutuġe bo hunġunaġdo âmâ gain gain

arim makyengiwiap? Anutuŋe makto siâŋe hin kulengoep, “Pat âlep den makmak luâk togombiâ âmâ, munŋande han nâŋgâ nâŋgânennje mem owâimap.”

Anutuŋe Yuda luâk âmbâle yenŋondo bo nâŋgaŋi.

¹⁶ Den pat âlepŋe ire amâ luâk hârokŋe bo nâŋgaŋmâ bunŋerâm kepilâyi aregât Yesaianje hin magep, “Kembu, den pat âlepŋe makmâ miawaktenŋe siâŋe bo nâŋgaŋmâ kârigiep.” dâep.

¹⁷ Aregât hin nâŋgâweren. Siâŋe Kristogât pat makyengimbo den bunŋe nâŋgâmaen. Akto den bunŋe nâŋgâennje amâ biwi kat katgât miawakmap.

¹⁸ Gârâmâ aregât hin aiyenŋuân. Luâk âmbâle amâ den pat âlepŋe are bo nâŋgâyi mon? Hain bo. Anutuŋe makto siâŋe hin kulengoep.

Denyenŋande hânŋe hânŋe sambelem ârândân agep. Akto den lauyenŋande hân tunŋunângen ârândân agep.

¹⁹ Aregât gaetŋe hin aiyenŋuân, Israe luâk bo nâŋgâm henŋemgoyi mon? Hain bo. Ulikŋân Moseŋe hin kulengoep,

“Anutuŋe hin dâep, Nâŋe luâk yânŋe meyektere ye ewangiyekbiâ nâŋgâmbiâ bâliwiap. Akto luâk kâmot bo nâŋgâ niŋbai are olonyektere yekmâ biwiyenŋe kâlâp akbiap.” dâm kulengoep.

²⁰ Akto beirâ Yesaianje den umatŋe mem gem makmâ âmâ bo aŋun aŋgim hin dâep,

“Anutuŋe hin dâep, Bo kulâgât nekmâ malinje penâniŋi. Nâŋgât bo makmâ mali yâk yenŋât mete katyenŋiân.” dâep.

21 Hain akmâ Yesaianje Israe luâk yâk yengât hin makmâ kulemgöep,

“Anutunje hin dâep, Nâ luâk kâmot nângâm gulip agakne akto den kokone sop kâlep ganjet dâm yengonmâ mandere bo togoyi dâep.” dâm kulemgöep.

11

Anutunje Yuda luâk bikneâk ikinjet pat meyegep.

¹ Aregât nâ hin aiyenguan, Anutunje Yuda luâk hârok hepunnenegep mon? Bo. Hain bo agep. Amâ nâkai Israe gâtne manmâ gan. Akto hakune amâ Abraham. Akto nâmâ Bensamin kâmolân gâtne mandân.

² Anutunje Israe bo hepun nenegep amâ hingât. Uliknân luâk nângâyengim potatyegap amâ bo hepun yekmap. Amâ ye Anutugât denne are bo oyanmâ nângâmai mon? Eliane Israe luâk yâk yengât akmâ Anutu hin dâm maganep,

³ “Kembu, Israe luâkne propete yengum âmâ sumbe kat katgât are patakom itin gulam meyi. Dâ nuneâk mandere gai nuguwerâm aktâi.”

⁴ Hain dâmbo den hâunje gain purikalanep? Hin. “Nâ luâk 7,000 koratyengure lâpio kotne Baali yâkgât bo kângoanji.”

⁵ Anutunje hain dâepgât hin nângâne. Anutunje han kalem akmâ Yuda luâk bikne mem kepilâ yegepgât mandâi.

⁶ Aregât Anutunje han kalemjaet akyengiep. Akyengiep gât âmâ agak meme yenjaet bo akyengiep. Hain bo akto dâine âmâ han kalemne bunne bo akbop.

⁷ Akto gain gain nângâweren? Israe luâk yâkne Anutuŋe nenekto huraguâkgât kulâgâtâmâ âi humo meyi, are bo mem miawagi. Dâ Anutuŋe mem kepilâ yegep yâkne âmâ meyi. Bikne humo âmâ Anutuŋe makto biwiyenê kârik agi.

⁸ Aregât Anutugât denŋân hin tatâp,

“Anutuŋe han yenê mem gâlikoep. Akto dewunyenê gai mem limbâpkoep. Akto ondopyenê mem gisapkoep. Gisapkombo gam gam maleine uŋak hainâk yu mandâi.

⁹ Akto Dawidiŋe hin dêep,

“Anutu, gâŋe makmenâ sot nem tatbiân âmâ sot akto kat katyenande lâlâmbâlân dowâk peŋ panmâ yenŋuâk. Akto wan me wan agigât hâuŋe hân dâpŋân gewai hainare miawakyenŋiwiapgât makmenâ miawagâk.

¹⁰ Gâ dewunyenê mem limbâp komenâ dewun bok akbai. Dâ hamiyenê mem gonŋonŋomenâ pâit pâitŋe akmâ manmâ âgâwei.” kulemgoep.

Anutuŋe kâmot siân gâtŋe ikinŋaet pat meyegep.

¹¹ Akto hin aiyenŋuân. Israe luâk yâkne mokmok mem peŋ panmâ mom bo akbaigât hain miawagep mon? Hain bo. Israe luâkne bâlenê agigât Anutuŋe Israe gâtŋe bo manmai meyegep. Meyekto âmâ beirâ Israe gâtŋande Israe gâtŋe bo manmai manman âlepŋân manmai are yekbiâ bâliwiapgât.

¹² Akto Israe luâk âmbâle bâlenê agi aregât den pat âlepŋe hânŋe hânŋe ârândân arim metiep. Akto Israe luâk âmbâle yeukne akbiâ Anutugât pat bo miawakyenŋiep gât Yuda luâk bo manmai yâk yenŋâlân den bunŋe peniyenŋiep. Yei, maleine

Anutuŋe Yuda luâk hârok meyekbiawân âmâ hârok bunŋe miawaknengiwiap.

¹³⁻¹⁴ Galalupne, hinŋe Yuda luâk bo manmai ye den ire makyenŋire nâŋgâŋet. Nâŋgât kâmot hâwât yektere bikŋande nâ watnekmâ âlepŋe akŋetgât Yuda luâk bo manmai yenŋât Aposolo manman. Akto âine egâlian kakŋân meman.

¹⁵ Akto Anutuŋe Israe luâk hepunyegep gât âmâ Anutuŋe hân ârândânŋan manmai yâk meyegep. Arekŋe Israe luâk meyekbiawân amâ momonŋan ba golâ manbaengât miawakbiap.

¹⁶ Akto sot ulikŋe Anutu wandenŋe mendâp benŋe sot hârok ârândânŋ akmap. Dâ lâwin kândârânŋande ârândânŋ yendo gai bât bâtŋe gai hainâgâk ârândânŋ yembiap.

¹⁷ Den ginŋe siâ hin makbe. Anutuŋe bât bâtŋe bikŋe hârem panmâ aregât welamŋan oliwa pâlonŋangen miawagep aregât bâtŋe gâ Yuda luâk bo manmat oliwagât tuŋe membiatgât katgekmâ dewatigegep.

¹⁸ Aregât gâŋe lâwin bât bâtŋe tâmbâŋe Yuda luâk yâk bo nâŋgâyenŋimenâ gembo âmâ agat agat bo akben. Hain akbâtgât hin nâŋgâwen. Gâ lâwin kândârânŋe are bo damunŋe akmâ henŋemgomat. Kândârânŋe Yuda luâk arekŋe ge tân gugumai.

¹⁹ Gârâmâ hin dâwerât mon? Anutuŋe nâŋgât akmâ katmâ dewatinegâk gât bât bâtŋe tâmbâŋe are liŋgâtmâ palep. Panmâ nâ dâgâm dewatinegep.

²⁰ Gâ Yuda luâk bo manmat amâ bundâk maktât. Anutuŋe Yuda luâk manmai arekŋe bonânŋanŋi gât hârem panyegep. Dâ gâmâ Anutu nânŋanŋmatgât kindât aregât hâkge bo mem agatmâ âmâ kânŋgom

manben.

²¹ Amâ Anutunje oliwa ikinje bât bâtne bo yai-goepgât gê hainâgâk bo yaiguguwiap.

²² Aregât gê han kalemgât akto Anutunje hâmbin yekmapgât bo nelâmginjbiap. Hâmbin yegepgât den bunne hamianj yâk yengâlân hâuñe miawagep. Dâ han kalemjaet bunne are âmâ gângâlân emelâk miawagep. Aregât gê yâkgât han kalemjaet akmâ nânganmâ manmenâ bunne âlepñe miawakbiâp. Dâ hain bo akmenâ âmâ gê gai hârem pan gekbiap.

²³ Akto bât bâtne tâmbâñe yâkñe biwi kârikyenjaet hepunbaiân Anutunje lâuwâñe dewatim katyekbiap gât kârikñe talañdâpgât meyekmâ dewatim katyekto ârândân akbiap.

²⁴ Akto Anutunje oliwa kâit mengekâm oliwa emesa lâwinñân dopyenje bo tatâp ain katmâ dewatim katgegepgât bo pâpkomap. Aregât oliwa emesa ikinje bât bâtne gaetñe mem dewatiyekbiapgât âmâ âinje owâinje akbiap.

Anutunje Yuda luâk han kalem akyenjiwiapgât keinje.

²⁵ Galalupne, ye yenjaet nângâ nângâyene nângâmbiâ humo akbopgât den iregât keinje makyenjiwe. Anutunje Israe luâk bikñe han biwiyenje gisapkoep. Gisapkombo âmâ beirâ Yuda luâk âmbâle bo manmai dondâ Kristogâlân dewatimbiâ âmâ

²⁶ âlepñe Anutunje Israe luâk kâmot hârok meyekto âlepñe akmâ metewai. Aregât den Anutunje makto Yesaianje hin kulemgoep,

“Sion gimbânânba luâk siânje hengemgom nengiwipnje miawakmâ Yakobo gâlânba gagap higenje hambunje uruto ariwiap.

²⁷ Hain akto nâ bâlenje yenje puliwianân ain nâ olop manbaigât makmâ hâreyengiwan.”

²⁸ Israe luâkne amâ Yuda gâtne bo manmai yâk yengât akmâ pat âlep dengât gasa manmai. Dâ Anutunje ikinje han kalemjaet akmâ kepilâ yekbiapgât akto hakulupnenne yâk yengât akmâ okot âlep dondâ akyengimap.

²⁹ Amâ Anutunje wan me wan nengimap are akto oloŋ nenekmap aregât pat bo hilipkombo yeukne akmap.

³⁰ Ye uliknân den koko akmâ mali akto Israe luâk yâkne gai den koko akmâ mali aregât Anutunje ye han kalem akmâ meyegep.

³¹ Hainâgâk Yuda luâk yâkne han kârik akmâ den koko akmâ manmâ gayi Anutunje ye han kalem akyengiep gât yâk gai hain kalem akyengiwiap.

³² Anutunje luâk hârok den konogân manmai dâm nâŋgâm hengemgoep aregât luâk hârok oloŋ nenekmâ han kalemjân katnenegep.

Anutu humo yâk konok mepaiŋe membaen.

³³ Yei Anutugât han kalem unsambe akto nâŋgâ nâŋgâne humo agat agatne talanmap aregât bâtgumne pikmâ yeanmap. Yâkne makmâ kepilâ kepilâ akto makmâ kotgâ kotgâjaet keiŋe luâkne bo nâŋgâwâen. Dâ âi memenjaet dâp are gai luâkne bo ekmâ hengemgomaen.

³⁴ Kembangât hannân den yendâp, are luâk niŋande nâŋgâep? Dâ Kembunje den makmâ kindo ain niŋande dengât tângom magep?

35 Dâ niñande wan me wan Anutu wanđo ârândân agepgât hâu are kutigilañbiap?

36 Amâ siâ me siâ hârok yâkgâlânba togomap. Akto yâkñe wan me wan ketugumbo ârândân akmap. Akto yâkñe hârok damunñe akmap. Aregât egâlian pagalenñe yâkgâlân dewatim dewatim yem âgâwiap. A bundâk.

12

Hâknennande Anutugât sumbe akbiâp.

¹ Aregât galalupne nâ Anutugât han kalemñaet akmâ den sami makyengire nângâñet. Ye hâkyenñe Anutugât sumbe golâ kotgâm wanbiâ nângâmbo âlepñe ârândân akto ekto huraguwiâp. Hain akbai amâ Anutu hon manman bunñe manañniâm.

² Akto agak memeyenñe hângâlâk nângâm manmai dop are bo akbiâp. Anutunñe hanyenñe nângâ nângâyenñe mem purikatberâmbo owâi akmâ nângâmbiâ humo agâkgât Anutugât han âlepñe ârândân are miawakyekto ekmâ egâlianbei.

³ Anutunñe han kalem niñep gât ye hârok makyengire nângâñet. Siânñe ikinjaet nângâmbo âgâ âgânñe bo akbiâp. Anutunñe den dâtânñe wanđo nângañdo dop areâk akbiâp. Amâ ikinjaet nângâmbo humo bo akbiâp.

⁴ Amâ hin nângâñet. Hâk pânñenñe amâ konok. Dâ kei bâtnenñe biwirânñe âi keiñe keiñe memai.

⁵ Aregât dop hainâk nen amâ dondâ dewatienñe hâk pânñenñe konok aktâp. Aregât kei bâtnñe tân agu agu akmaen.

⁶ Anutunñe wan me wan keiñe keiñe han kalemñaet akmâ nengiep are ârândân tatnengiep.

Aregât dopnân âi meniâm. Aregât Anutuņe den lau makmâ miawakbiapgât Anutu nânğanmaengât dopnân makmâ miawakbaen.

⁷ Anutuņe hon manman âi nengiep amâ âi are kârikņe akmâ owâiņeâk akmâ membaen. Siâņe Anutugât den makmâ kepikmâ makyenġimap amâ âi are membiâp.

⁸ Biwiyeņe gewop gât den sami makmap yâk aregât kârikņe yeandâpgât makbiâp. Dâ luâk siâņe âmâ galalupņe wan me wan yenġiwerâm âmâ hâuņaet bo nânġâm yân han kalem akmâ yenġiwiâp. Dâ luâk siâņe Yesugât puligât damunņe akmâ luâk âmbâle umburuk yenġiwerâm âmâ biwi owâiņeâk akmâ dowâk tânyenġuwiâp. Bikņe kundatdâņe umatņânâk manmai are siâņe okot nânğanmâ tângowerâm âmâ mâru guru kakņân tângowiâp.

Han kalemġât den.

⁹ Han kalem agak are hâkņeak bo akbei. Siâ me siâ bâlenġaet hâkân yekbiâp. Dâ siâ me siâ âlepņaet âmâ egâlianġbei.

¹⁰ Ye gala agak bunņe akmâ han anġi goanġi akņetġât kârikņe akbei.

¹¹ Konam bâlâk kârikņeâk manbei. Biwi yenġande owâiâkgât damungom manbei. Kembunenņe hon bawa aganġbei.

¹² Anutuņe wan me wan katyenġiep aregât nânġâm egâlianmâ manbei. Dâ hâk hilâlâm kakņân manmâ âmâ bo hâkân akmâ manbei. Akto hokboâk hokboâk Anutu ulilanmâ dewatim mem manbai.

13 Kristogât luâklupņe umburuk manbai âmâ dowâk wan me wan bo talanbiap are wanbei. Akto lombo togombiâ âmâ dowâk owâiņeâk gala akyengiwei.

14 Bikņande yengum watyekbiâ âmâ yâk yengât akmâ Anutu ulilanbei. Sait den bo makyengiwei.

15 Bikņande heroņe maroņe manbiâ âmâ yâk olop heroņe maroņe akmâ tân yenguwai. Dâ bikņande indem tâgâiak akbiâ âmâ are tânyengum olop indewei.

16 Hanyeņe mendugum kinmâ siâ me siâ konokgât han kalem akmâ manbei. Yenjaet nâņgâmbiâ dondâ bo âgâwiâp. Nen gegeņe dâmai are dowâk tânyengum manganyekbei.

17 Siâņe bâleņe akyengimbo âmâ bâleņe bo agaņbei. Dâ luâk âmbâle hârokņe wan nâņgâmbiâ ârândâņ akbiap âmâ areâk nâņgâmâk manbei.

18 Ye han kau kau akmâ luâk âmbâle hârok gala akyengim manbei. Amâ bikņande hâkâņgiņbiâ âmâ hanâk dosane bâlâk manbe dâm gala akyengiwei.

19 Galama, bikņande kuk hengân akyengimbiâ âmâ dosayeņe yeņeak bo makmâ hâreanġim manbei. Kembuņe kuk are hâuņe meâkgât lâmgom manbei. Aregât Anutugât denņande hin dâep, “Dosa kotgâ kotgâgât âi amâ nâņgât. Aregât dosayeņe mem hâuņe yeņgiwian.” dâep.

20 Gârâmâ ye hin akbei. Gasagande sotgât momberân dâmbo sot wanben. Tugât nâņgâm dâmbo tu wanben. Gâ hain akmâ âmâ kâlâp kautņân katbiat dop hainare miawakyengiwiap.

21 Bâleņande gâ bo mem ge katbiâp. Aregât gâ siâ me siâ âleņe akmâ bâleņe aregât kârikņe komenâ

gewiâp.

13

Kiap gawaman yengât den.

¹ Humomolupnenne, kiap, gawaman akto kaunsoli âmâ Anutu konok arekne luâk nengât damunnenne manbeigât katyegep aregât nen hârok yâk yengât den lokoenne ârândân agâk.

² Aregât luâk siâne gawaman yâk yengât den kom âmâ Anutugât den gai kombiap. Hain akbai âmâ hâuñe membai.

³ Amâ hingât. Humomolupnenñande amâ agak meme âlepne bo mem ge katmai. Dâ agak meme bâleñe aregât hâuñe yengimbiâ hamewakmâ manmai. Aregât gâne humomolupnenne yengât akmâ hamep bâlâk manberâm kinmâ siâ me siâ ârândân akben. Siâ me siâ ârândân akmenâ gângât nângâmbiâ ârândân akbiâp.

⁴ Gawaman nenñe amâ Anutugât hoñ bawa manmâ tân gugumbiâ âlepne manbiatgât âi memai. Gârâmâ gâ bâleñe akmâ membiat âmâ hamewakben. Yâk bugâ hanâk bo konmai. Bo. Yâk âmâ Anutugât hoñ bawa manmai aregât bâleñe meme luâk yâk yengâlân Anutugât kuk miawakyenğiâp dâm âi mem kinmâ hâuñe yengiwei.

⁵ Aregât den lauyene lokom hengemgoweï. Are âmâ Anutune hâuñe nengiwiapgât hamep gâlâk bo. Amâ guge hangande mokmok membopgât hangande kau kau akbiâp.

⁶ Anutune damun âi damunyenñe agep are memaigât yenñe gawaman puli dâtâne are yengimai.

⁷ Aregât yeñe yâk wan makmâ hâreyi are ârândân yenjiwei. Puligât dâtâñe magi are dopñân puli yenjiwei. Dâ hoñ manmangât dâtâñe makmâ hâreyi âmâ hoñ manyenjiwei. Kângo nenginjet dâm hâreyi âmâ hainakmâ akyenjiwei. Lau nenñe lokowei dâm hâreyi âmâ lau yeñe lokowei.

Gala konok mannegât den.

⁸ Akto siâ me siâgât hâu are dowâk kotgâmbiâ bo akbiâp. Dâ hâu konok tatyenjiwiâp amâ hin, han kalem akmâ okot anji goanji akñetgât membiâ bo bo akbiâp. Aregât han anji goanji olop manmapñe âmâ den kârikñe lokomapgât dop akmap.

⁹ Anutugât denñande hin maktâp, “Luâkdâ âmbendâgât pat bo hârewen. Gâ bugâ bo komben. Gâ kâmbu bo memben. Gala siâgât siâ me siâ are nângât bo dâwen.” Den kârikñe aregât bikñe hârok mendugum kautñe konok katmâ hin dâep, “Gâ guge tân agumat dop hainâk luâk siâ tângowen.”

¹⁰ Han anji goanji olop manbiapñe âmâ galañe bâleñe bo agañbiap. Aregât han kalem akmâ okot âlep akyenjiwaen âmâ den kârikñe hârok lokowaengât dop miawakbiap.

Pagalenân manbaen.

¹¹ Akto hain akñetgât sop iregât keiñe nângâi. Nen ulikñân Kristo nânganñenñe henjem nenguwiapgât dâp miawaktâp. Dâ hinñe henjem nengum metewiapgât sop ewumâk aktâp. Aregât asinânba golâ akmâ agatbei.

¹² Hândâk pipiñe akto emet haunberâmngât hândâkgât siâ me siâ guñmâ panmâ âmâ pagalenjaet tembe mâron meakmâ manbaen.

¹³ Yanep pagalenân manmaenne ârândânâk manniâm. Are amâ sot songo nem munen bo akbaen. Akto tu kârikne nem gulip bo akbaen. Akto agak meme bâlene anun olowâk are bo mem manbaen. Me gasa akmâ bo potalakbaen. Me siâgât nângâenne bo bâliwiâp.

¹⁴ Gârâmâ Kembu Yesu Kristo yâk luguakmâ amâ benne hâkyenande egâlian bâlene penianbopgât nângâmâk nângâmâk manbei.

14

Galagât nângâmbiâ bo gewiâp.

¹ Galalupne, luâk âmbâle bikande Kristo getegâk nânganmai are dowâk gala akyengiwei. Amâ galagât heyengiennne penânengimbiâ ain nângâ nângâenne gewiapgât papalakmâ manbaengât bo.

² Luâk siâ biwi kat kat kârikne talanmapne amâ sot hârok hanâk nemap. Dâ siâ biwi kat kat yeukne talanmapne amâ gârânâk nemap.

³ Aregât luâk siâne sot hârok nemapne amâ galane songo bo nemap aregât bo nângando gewiâp. Akto luâk songo bo nemapne amâ galane sot hârok nemap are den âiân bo katmâ kotgâ anbiâp. Amâ Anutune galane gala aganepgât.

⁴ Aregât gâ wangât Anutugât lau lokomapne den âiân katbiat? Amâ bo ârândân akbiap. Yâk amâ Anutu Humonaet enemân kinmâ kârikne akbiap me yeukne akbiap. Are amâ Kembugât pat. Gârâmâ hin nângâne. Humone âlepne tângombo kârikne akmâ kinbiapgât bo yeukne akbiap.

⁵ Hainâk luâk siâ hilâmgât âi meme siâ nângâmbo gembo siâ nângâmbo humo akmap. Dâ luâk siâ

âmâ âi meme hârok nângâmbo ârândân akmap. Aregât siâ me siâne hin me hain akberâm nângâm heŋgemgom kârigem kinmâ akbiâp.

⁶ Hilâm âi meme oyaŋmâ potatmapŋe amâ Kembugât akmap. Dâ Anutu mepaiŋe memapgât Kembugât pat akbiap.

⁷ Aregât keiŋe hin. Nengâlânba siâne ikiŋe kârikjân bo manbiap. Dâ ikiŋaet akmâ bo mombiap.

⁸ Manman nenŋe amâ Kembugât akmâ manmaen. Dâ mombaen amâ hainâk yâkgât akmâ mombaen. Aregât manbaen me mombaen are amâ Kembugât pat.

⁹ Akto Kristoŋe momoŋe akto golâ yengât kautŋe akmâ damun nenŋe akbiapgât mom âmâ golâ agep.

¹⁰ Akto gâ wangât gala den âiân katmâ hâkŋe tunmâ akmat? Me wangât galagaet nângâmenâ gewiap? Nen hârok Anutuŋe makmâ hârenengiwiapgât tat tatgât enemjân kinbaen aregât galagaet bo makmâ kotgâwiat.

¹¹ Anutugât denŋande hin dêep.

Kembuŋe hin dêep, “Nâ mandângât luâk âmbâle hârokŋe nâ pâwut ligininbai. Akto hârokŋe kotnaet nângâmbiâ humo akto makmâ mem owâiŋe ketugunekbai.” dêep.

¹² Aregât nen hârok Anutugât metenân kinmâ keinenŋe makmâ miawakbaen.

¹³ Aregât nen nenŋeâk den âiân bo makmâ bo hâk nenŋe tunmâ aŋgi goaŋgi akbaen. Dâ hin aktenŋe ârândân agâk. Galalupnenŋe han gulip akbâigât wan me wan bâleŋe dâpyenân bo katenŋe keiyeŋe bo peŋ panbei.

14 Nâ Kembu Yesu olop mandân aregât hin nângâm kêrigeân. Sot siâ siâ nendere amâ bâleñe bo akniñmap. Gârâmâ siâne sot siâ me siâ ire nem bâleñe miawak niñbop dâm âmâ hanâk nembiap yâk âmâ bundâk bâleñe miawaganbiap.

15 Aregât gâne galagât sotgât bo nângâm hanoko agañmenâ hanñe mokmok membiâp amâ han kalemñaet pat bo akmat. Galage âlepñe agâkgât gai Kristoñe yâkgât akmâ moep. Aregât nângâm galagande sotgât nângâmbo umatñe akmapgât nângâmâk akmâ nem manben.

16 Ye siâ me siâ membiâ ârândân akmap are luâk bikñande nângambiâ gewopgât damunñe kêrikñe akmâ manbei.

Sot songoñe manman kêrikñaet tân bo akbiâp.

17 Akto luâk âmbâle bikñe Anutuñe damun nenñe akmap sot bikñe sapa aktenñe ârândân akbiap dâm âmâ Anutugât keiñe bo nângâmai. Anutuñe damun nenñe akmap aregât keiñe amâ hin. Anutuñe nenekmâ dosayeñe bo dâm ikiñe Heak nengimbo tân nengumbo Anutuñe denân bo katnenekbiap dâm heroñe aktenñe biwinenñe sândugemap.

18 Siâne dâp are tâlim Kristo hon manañdo are Anutuñe ekto âlepñe akbiap. Akto luâk bikñande gai nânganbiâ ârândân akbiap.

19 Aregât nen gala tân agu agu akmâ kindenñe biwinenñe sândugeâkgât kêrikñe akniâm.

20 Gâ sotgât akmâ Anutugât âi are bo itiñ gu-lam memben. Amâ sot songo are âlepñe hârok. Gârâmâ gâ hanâk hanâk nem manmenâ galagande gekto bo ârândân akto hanñe bâlimbo âmâ bâleñe miawakgiñbiap.

²¹ Gâ galagaet nângâ nângâne gâlikowâtgât yâkgât akmâ songo akto wain tunje hâkâne akmenâ ârândân akbiâp.

²² Aregât siâ me siâ hain aregât nângâm âmâ hangân yendâp are Anutugât metenân mem manmenâ gugaet biwigânâk yembiâp. Aregât siâne ikinjaet nângâmbo ârândân akto âmâ ikinje den âiân bo kalakto biwine sândugembo herone akmap.

²³ Dâ siâne sot songo hanokoagân nendo bâliwiap. Amâ hingât. Yâk Kristo nânganjo huraguepgât bo nângâm nemap aregât. Akto siâ me siâ are biwi kat kat olop bo aktenje dosane olop akbiap.

15

Yesugât nângâ nângâ watmâ manbaen.

¹ Galama, kârikne olop manmaen nenne âmâ yeukne manmai are sokom katyektenne ârândân akbiâp. Sokom katyekmâ âmâ nenjaet nângâ nângâ nenjân bo maniâm.

² Nen galalupnenne yâk yengât nângâmâk âlepne aknet akto Kristo nânganbiâ humo agâkgât tânyenjuniam.

³ Aregât keine hin. Kristone âmâ hainâgâk ikinje ukenne bo walep. Dâ Anutugât denjande hin maktâp, “Anutu, gâ hâkânge dâm dâyi yâk yengât den are nângât kaknân âgâep.” dâep aregât den walep.

⁴ Are tâmbâne dondâ den makmâ kulemgoyi are Anutugât keine nângâm hengemgone gât kulemgoyi. Anutugât kulemne hârokne mem kârikne mânginenekmâ mem owâinenekto siâ

me siâ nengât pat dâtâne nângâenne biwinenne owâiwiapgât kulemgoyi.

⁵ Anutune kârikne aknengimapgât akto mem owâinenekbiap gât ambonande akyengimbo Yesu Kristogât dopnân han nângâ nângâ konok akmâ manbaigât ulilandân.

⁶ Ulilandere akyengimbo han biwiyene mendugumbo Kembu Yesu Kristo yâkgât Ewene Anutu mepaine mem manbai.

⁷ Aregât Anutugât kotne humo agâkgât Kristone meyegep dop hain âgâk ye gala agangim manbei.

⁸ Aregât hin makyengiwe. Anutune hakulupnenne den pat âlepne makmâ hengemgom makyengiep are bunne miawagâkgât Anutune amâ den bunneâk makmap a hârok nângânetgât Kristone Yuda nengât akmâ hon bawa aknengiep.

⁹ Hain aknengim amâ Yuda luâk âmbâle bo manmai yâkne Anutune han kalemnaet akyengiepgât mepaine mem herone aganbiâ kotne agatbiâp. Aregât Anutugât denne bikne hin tatâp,

“Nâne Yuda luâk bo manmai yâk yengât hutyenân kinmâ mepaige mem kinmâ kep kom kotge patne makmâ egâlianbian.”

¹⁰ Akto den siâ hin tatâp,

“Yuda luâk bo manmai yene Anutugât kâmotlupne olop makmâ herone marone akbei.”

¹¹ Akto siâ hin,

“Yuda luâk bo manmai ye hârokne Kembu makmâ mepaine membei. Dâ luâkne luâkne hârokne yâkgât akmâ owâine aganbei.”

¹² Akto Yesaianne hin kulemgoep,

“Lâwin penâñe Yesegât kâmñe siâ miawakmâ yâkñe Yuda luâk bo manmai damunyeñe akto nânğanbiâ biwiyeñe owâñe akbiap.”

¹³ Galama, Anutune biwi owâi aknengimapgât Amboñe yeñe nânğanigât akmâ wâtñande totokoyekto heronje maronje nânğâmbiâ biwiyeñe sândugembo Heakgât kârikñeñe yengimbo himbimgât nânğâm owâñe akmâ manmâ âgâwaigât ulilandân.

Paulonje âi âlepñæet mârune agep.

¹⁴ Galalupne yeñe han kalemyeñe yendâp are akto Anutugât keñe âlepñe nânğâm hengemgomai aregât yenjak mem kârigeakbaigât bo pâpkowai. Are keiyeñe nânğâm hengemgoân.

¹⁵ Hain nânğan gârâmâ hanâk Anutune han kalemñaet niñepgât den bikñe meteâk kulemgom kinmâ Anutugât keñe nânğâyenggiân.

¹⁶ Yesu Kristonje Yuda luâk bo manmai yâk yengât akmâ âi membiangât wâtñe niñep. Aregât akmâ Anutugât pat âlep dennæet sumbegât âi mendere Heakñe hanyenân han kâmdâk katyengimbo Kembugât sumbe akbiâ Anutune ekto ârândân akbiap. Amâ Yuda luâk bo yâk yengât.

¹⁷ Aregât Anutugât âi meman are Yesu Kristogât akmâ nânğære agat agat akmap.

¹⁸ Âi are âmâ nunaet kârikñân wannande mem-bom. Bo. Yesu Kristonje Yuda luâk bo manmaine Anutugât lau lokowaigât wâtñe niñep aregât âi mem makyengiman.

¹⁹ Akto kulem bo egekñe keñe keñæet kârikñe akto Heakgât kârikñe aregât akmâ Yerusalem

kepiamba Kristogât keiŋe makmâ hân hârok ândeanmâ makmâ sambelem arire Ilurikon hânân ârândân agep.

²⁰ Hain akmâ luâk bikŋe yengât âi kalamân gaetŋe membomgât Kristogât keiŋe bonângâmai ain kârikŋe akmâ makyenŋiwerâm aktere humo akmap.

Pauloŋe Roma kepia ewangim Sipen ariwiapgât magep.

²¹ Anutugât denŋe bikŋe hin tatâp. Aregât dopŋân akman,

“Siânŋe yâkgât pat bo makyenŋimbiâ manmâ gayi yâkŋe yâk ekbai. Dâ yâkgât patŋe bo nângâm gayi yâkŋe yâk nânŋarŋbai.”

²² Den aregât akmâ yengâlân togowerâm kindere sop ârândân wan me wan siânŋe dâp tigininŋep.

²³ Dâ manmâ gan ain yengâlân togowerâm han-nande nângâm malân aregât akto hân iregen âine bo tatniŋdâpgât.

²⁴ Sipen hânân ariwerâm akmâ yengâlân togowerâm nângân. Togom ye olop makmâ kârikŋeâk tân agum akmâ dâp hengemgom katnekbiâ hepun-yekmâ owâinŋeâk Sipen hânân ariwian.

²⁵ Gârâmâ hinŋe âmâ Yesugât kâmot Yerusalem manmai yengât akmâ puli mem arim yenŋiwerâm aktân.

²⁶ Amâ hingât. Makedonia hân akto Akaia hânân gâtŋe Yesu nânŋarŋmaiŋe, Yesugât kâmot Yerusalem kepiam umburuk manmai yâk tânyenŋuwerâm owâim puli kali.

²⁷ Amâ han kalem yenjaet akmâ katbiâ ârândân agep. Yuda luâk bo manmainje amâ Yesugât den pat amâ Yuda luâk yâk yengâlânba nângâyigât hâuñe potatmâ yengimbiâ ârândân akbiâp. Hain dâm heronje akmâ puli kali.

²⁸ Puli katbiâ huraguep are mem Yerusalem kepiar arim yengire bo akto Sipeñ hânân ari-wiangât yengâlân son togowian.

²⁹ Aregât hin nângân. Nâ yengâlân siâ me siâ bâlâk bo togowian. Kristonje meme akniñmap are mem togom yengire nângâm âmâ heronje maronje manbai.

³⁰ Galalupne, Kembunenñe Yesu Kristogât akmâ akto Heakgât han kalemgât akmâ ondop pâron den makyenñiwe. Ye nângât akmâ nâ olop Anutunje tânnuguâkgât wârakmâ Anutu ulilanbaen.

³¹ Ye nângât ulilanbiâ âmâ Yuda hânân gâtñe Anutu bonânğanmai arekñe menekbâigât Anutunje bâtyenânba mem oloñnekbiap. Akto Yesugât kâmot Yerusalem ain manmai yengât akmâ puli kali are mem yengire ukenñe agâkgât ulilanbei.

³² Hain ulilanbiâ Anutunje nângâyengim meme akniñdo heronje akmâ yengâlân togom tatere biwi owâiâk akniñbai.

³³ Anutu lumbe Ambonje âmâ ye olop manbiâp. A bundâk.

16

Paulonje Roma yengât nângâyengim malep.

¹ Galalupne, âmbâle siâ kotñe Poiñbe yâkñe Yesugât kâmot Kenkerei kepiar manmai tânyengum manmap. Yâkñe yengâlân togombo ye dowâk gala agañbai.

² Gala agañmâ Kembugât akmâ âmbâle arekñe nâ akto bikñe dondâ hoñ bawa nengiep aregât wan me wan bo talañbiap are dowâk mem wañmâ tângowei.

³ Akto luâk âmbâi lâuwâ Akuila akto Pirisila Yesu Kristogât âiñaet tân nugumandat yâk mañgan yelekñet.

⁴ Yâk lâuwâ âmâ nângât akmâ âi humo mem hâk hilâlâm nângâm bâsok moyiat. Aregât nâñeak bo, Kristogât kâmot Yuda bo manmai kâmotnenñe yâk yetgât okot âlep nângâyetkim manden.

⁵ Yâk yetgât emelan Kristogât kâmot mendugu-mai are nângât akmâ mañgan yekbei. Akto galane siâ kotñe Epaineto Asia hân humo ain ulikñân akmâ Kristo nângañep yâk gai mañganbei.

⁶ Akto âmbâle kotñe Mariane yengât akmâ âi humo miep aregât yâk gai hainâk mañganbei.

⁷ Akto nângât kâmolân gâtñe lâuwâ Androniko akto Yunia ulikñân nâ Kristo bo nângañânân sop ain nângañiat. Akto beirâ tembe lokonje hiko negi sop ain hainâk katyelekbiâ nâ olop talion. Hain akmâ manmâ gambela nen Aposolo manmaen nenñe yâk yetgât heronje akmaen aregât nângât makyetkiwei.

⁸ Akto nâ Humogât akmâ luâk siâ kotñe Ampil-iato yâkgât okotne nângân aregât mañganbei.

⁹ Akto Urbanonje Kristogât âi meyionân olop miep yâk akto galane Sitaki mañganyelektân gât makyetkinet.

¹⁰ Apelenje Kristogât akmâ âi humo mem bo hâkân agep are nen hârok nângâennje ârândân agep yâk akto Aristobulo yâkgât kâmot gai mañgan yek-bei.

11 Akto Yuda luâk galane Herodiongât akto Narikisogât kâmot bikne Humogât akmâ manmai yâk yengât nângâre âgâp aregât mangan yekbei.

12 Akto âmbâi lâuwâ Tiripaina akto Tiripose Kembangât akmâ âi humo mem mandat, yâk akto âmbâle siâ Peasi arekne Humogât âi mem hâk hilâlâm nângâep yâk hârok mangan yekbei.

13 Kembuñe luâk siâ kotne Rupu olonep yâk akto yâkgât memenje dop akmâ tân naguep yâk lâuwâ lâuwâ mangan yeleket.

14 Akto luâk kotyene Asin̄krito, Pilegon, Hereme, Patoroba, Herema akto Anutugât kâmot bikne olop manmai yâk manganyeket.

15 Akto luâk âmbâi lâuwâ Pilorogo akto Yulia akto luâk siâ Nereo akto garine akto luâk Olumpa akto Kristogât kâmot yâk olop manmai yâk hârok mangan yeket.

16 Yekai hainâk Kembangât akmâ bâtyene koan̄jnet. Akto hânne hânne Kristogât kâmot yâkne yengât nângâ yengim mandâi.

Miti luâk hian̄gim yengât sami magep.

17 Galalupne, yengât hutyenân gâtñande ye umatñân manmâ potalakbaigât gâlikoyekberâm akmai luâk are yengât nângâm hengemgom damun akmâ hamep akbei. Yâkne Kristogât keine ye nângâ meteyi are mem gulip kowerâm manmai aregât hamiyengim yâk bonângâ yengiwei.

18 Luâk hain arekne Kembu nenne Kristo hon bawa bo agañmai. Amâ yenjaet tep yenjaet nângâmbiâ agato aregât hon agañmai. Akto luâk âmbâle biwiyene bo damunne akmai yâk

makyengim mulun yekmâ heyengimbiâ biwiyenê gulip akmap.

¹⁹ Dâ ye âmâ Kristogât den lokomai aregât patnê kepia ârândân sambelem arimbo nângâm meteyi aregât yengât akmâ heronê akman. Heronê akmâ âmâ yengât han kau nângâm hin aknetgât makyengiwe. Siâ me siâ âlepnaet biwi owâi kaknân manbei. Dâ siâ me siâ bâlenande hâwât yekto âmâ bo nânganbei.

²⁰ Ye hain akmâ manbiâ âmâ sop kâlep bo aktoân Anutu biwiyenê sândugeâkgât ambonande Niambi keiyenê amuknân hâkokombo tâliwai. Kembunenê Yesu Kristogât han kalemnê yengâlân yembiâp.

Gala den.

²¹ Galane Timoteo bât tângone akto Yuda kâmotlupne yengâlân gâtne Lukio, Yason, Sosipate yâknê yengât nângâyengiâi.

²² Akto nâ Teatio, nâ kulem ire Paulonê maknindo kulengoân nânê Kemputgât akmâ nângâ yengiân.

²³ Gaionê nâ Paulo akto kâmot hârok in tân nengumap hainâk yengât nângâ yengiâp.

Akto luâk Erastonê kepia iregât puli damunne akmap akto gala nenê Koato yâknê hainagâk ak-tat.

Anutu akto Nanê Yesu yetgât kot humo.

²⁴ Kembu nenê Yesu Kristo yâkgât han kalemnê yengâlân yem âgâwiap. A bundâk.

²⁵ Anutugât pat âlep makman akto Yesu Kristogât kot makmâ sambeleman, aregât dowân Anutunê tânyenguwiapgât bo pâpkomap. Akto kâriknê meyekbiapgât kâriknê talañdâp. Anutu manman

kârikŋaet denŋe amâ yonâk yem gam malep âmâ hinŋe miapŋân miawagep.

²⁶ Anutugât propetelupŋande Anutugât den keiŋe kulemgoyi talep are hinŋe Anutu manman kârikŋe Amboŋande makto hânŋe hânŋe sambelem ariep. Amâ hânŋe hânŋe manmaine Kristo nânŋaŋmâ Anutugât lau lokowai gât Anutune makto miapŋân sambelem ariep.

²⁷ Aregât Anutu ikiŋe han nânŋâ nânŋâ humo talaŋdâp konok are Yesu Kristogât akmâ egâlianŋe humo makmâ agaŋdenŋe yem âgâwiâp kârikŋe. A bundâk.

Yusugât Pat Âlep Den
The New Testament in the Timbe Language of Papua
New Guinea
Nupela Testamen long tokples Timbe long Niugini

copyright © 1987 Wycliffe Bible Translators, Inc.

Language: Timbe

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Mar 2025 from source files dated 31 Aug 2023

03f82704-6ad1-5094-a78e-e240d9f2d4f8